

古今文綜

711.112
S7527

古

今

文

煉

古今文綜 第二部 書牘贈序之屬

第十二冊

目錄

第一編 書牘類

第五章 達情之書下

(戊) 懇摯

漢馬援誡兄子嚴敦書

漢鄭玄戒子書

北齊失名氏爲閻姬與子宇文護書

北周宇文護報母閻姬書

隋薛濬遺弟書

唐駱賓王上吏部裴侍郎書

唐韓愈與李翱書

宋蘇軾謝張太保撰先人墓碣書

宋曾鞏謝杜相公書

宋曾鞏寄歐陽舍人書

清洪亮吉與孫季述書

清汪中與劍潭書

清李慈銘與柯山親友書

(己)側豔

漢徐淑答夫秦嘉書

漢徐淑又報嘉書

魏文帝答繁欽書

梁簡文帝答新渝侯和詩書

梁何遜爲衡山侯與婦書

陳伏知道爲王寬與婦義安主書

北周庾信爲上黃侯世子與婦書

第六章 書牘之其餘各體

(甲)箋

(一)陳述

漢繁欽與魏太子牋

魏吳質在元城與魏太子牋

晉劉柳薦周續之於太尉劉裕牋

齊謝朓拜中軍記室辭隨王牋

梁任昉到大司馬記室牋

梁任昉百辟勸進今上牋

清洪亮吉出關與畢侍郎牋

清李慈銘與馬中丞牋

(二) 議論

漢楊修答臨淄侯牋

漢陳琳答東阿王牋

清龔自珍與江子屏牋

清龔自珍與人箋

清龔自珍與人箋二

清龔自珍與人箋三

(乙) 啟

(一) 感慕

梁蕭統十二月啟

北周庾信答趙王啟

唐王勃上從舅侍郎啟

唐王勃上明員外啟

(二)陳述

梁劉潛從弟喪上東宮啟

唐韓愈上留守鄭相公啟

唐李商隱上河東公啟

宋蘇軾謝中書舍人啟

(三)干謁

唐劉禹錫謝僕射李相公啟

唐李商隱爲先輩獻集賢相公啟

唐李商隱獻舍人河東公啟

王先謙上胡筱泉師啟

(四) 達謝

梁劉潛謝晉安王賜宜城酒啟

梁張纘謝東宮賚園啟

梁庾肩吾謝東宮賜宅啟

梁庾肩吾謝曆日啟

北周庾信謝趙王賚絲布等啟

北周庾信謝趙王賚絲布啟

北周庾信謝趙王賚米啟

北周庾信謝趙王賚白羅袍袴啟

北周庾信謝趙王示新詩啟

北周庾信謝滕王集序啟

唐李商隱謝河東公和詩啟

清李慈銘謝潘伯寅侍郎饋銀啟

清李慈銘謝樊雲門庶常惠先君子生日祭銀啟

(五)致賀

唐柳宗元賀趙江陵宗儒辟符載啟

宋秦觀賀呂相公啟

宋汪藻賀李丞相啟

清袁枚爲黃太保賀經略傅公平大金川啟

(六)公啟

清劉星煒爲勝國閩陳二公徵詩啟

清洪亮吉孫太孺人八十節壽徵詩啟

清吳錫麒徵張琴溪六十壽言啟

清金安瀾勸捐清江浦創造廣東會館啟

清蔡篋募捐義塚啟

清皮錫瑞重修屈賈合祠啟

(丙)帖

晉王羲之問慰帖

唐顏真卿與李太保乞米帖

清全祖望奉浙東孫觀察論南宋六陵遺事帖子

清全祖望奉答謝石林侍御論碑版故事帖子

(丁)簡

唐王維招素上人彈琴簡

宋秦觀與蘇先生簡

(戊)奏記

漢鄭朋奏記蕭望之

漢馮衍奏記鄧禹

(己)狀

唐韓愈與汝州盧郎中論薦侯喜狀

唐李商隱爲濮陽公與度支周侍郎狀

(庚)札

清孔廣森謝人代撰詩札

清梅曾亮覆陳石士先生札

(辛)疏

晉陶潛與子儼等疏

清李慈銘爲人作柯巖造祠屋疏

(壬)引

清李兆洛募修東林寺引

清蔡簾體卹溺遺引

清吳汝綸爲里中舉節烈引

古今文綜

第二部

書牘贈序之屬

第十二冊

杭縣張相讓錄

杭縣姚漢章閱訂

第一編 書牘類

第五章 達情之書下

(戊) 懇摯

伏波戒姪康成訓子。宇文母子之殷肫。薛氏兄弟之訣別。讀之使人

人增天倫之重焉。此一類也。賓王拳拳深其孺慕。容甫翬翬廣其孝思。讀之使人念鞠我之艱焉。此一類也。慎終鉅典。傳世高文。鮮民告哀。泣涕如雨。如子瞻之謝張太保。子固之謝杜相公。寄歐陽舍人。此一類也。密契古懽。商量出處。盈盈一簡。藹乎性真。如昌黎之與李翱。北江之與季逯。越縵之與柯山親友。此一類也。凡錄文十三首。

漢馬援誡兄子嚴敦書

吾欲汝曹聞人過失。如聞父母之名耳。可得聞。口不可得言也。好議論人長短。妄
是非正法。此吾所大惡也。寧死不願聞子孫有此行也。汝曹知吾惡之甚矣。所以
復言者。施衿結禕。申父母之戒。欲使汝曹不忘之耳。龍伯高敦厚周慎。口無擇言。
謙約節儉。廉公有威。吾愛之重之。願汝曹效之。杜季良豪俠好義。憂人之憂。樂人
之樂。清濁無所失。父喪致客。數郡畢至。吾愛之重之。不願汝曹效也。效伯高不得。
猶爲謹勅之士。所謂刻鵠不成。尙類鶩者也。效季良不得。陷爲天下輕薄子。所謂
畫虎不成。反類狗者也。訖今季良尙未可知。郡將下車。輒切齒。州郡以爲言。吾常
爲寒心。是以不願子孫效也。

漢鄭玄戒子書

吾家舊貧。不爲父母羣弟所容。去廝役之吏。游學周秦之都。往來幽并兗豫之域。
獲觀乎在位通人。處逸大儒。得意者咸從捧手。有所受焉。遂博稽六藝。粗覽傳記。

時觀祕書緯術之奧。年過四十。乃歸供養。假田播殖。以娛朝夕。遇闕尹擅勢。坐黨禁錮。十有四年。而蒙赦令。舉賢良方正有道。辟大將軍三司府公車。再召比牒。併名。早爲宰相。惟彼數公。懿德大雅。克堪王臣。故宜式序。吾自忖度。無任於此。但念述先聖之元意。思整百家之不齊。亦庶幾以竭吾才。故聞命罔從而黃巾爲害。萍浮南北。復歸邦鄉。入此歲來。已七十矣。宿業衰落。仍有失誤。案之禮典。便合傳家。今我告爾。以老歸爾。以事將閒。居以安性。覃思以終業。自非拜國君之命。問族親之憂。展敬墳墓。觀省野物。胡嘗扶杖出門乎。家事大小。汝一承之。咨爾熒熒。一夫曾無同生相依。其勗求君子之道。研鑽勿替。敬慎威儀。以近有德。顯譽成於僚友。德行立於己志。若致聲稱。亦有榮於所生。可不深念邪。可不深念邪。吾雖無絃冕之緒。頗有讓爵之高。自樂以論贊之功。庶不遺後人之羞。末所憤憤者。徒以亡親墳壟未成。所好羣書。率皆腐敝。不得於禮堂。寫定傳與其人。日西方暮。其可圖乎。家今差多於昔。勤力務時。無恤飢寒。菲飲食。薄衣服。節夫二者。尙令吾寡憾。若忽

忘不識亦已焉哉。

北齊失名氏爲閻姬與子宇文護書

天地隔塞。子母異所。三十餘年。存亡斷絕。肝腸之痛。不能自勝。想汝悲思之懷。復何可處。吾自念十九入汝家。今已八十矣。既逢喪亂。備嘗艱阻。恆冀汝等長成。得見一日安樂。何期罪釁深重。存歿分離。吾凡生汝輩三男三女。今日目下不覩一人。興言及此。悲纏肌骨。賴皇齊恩卹。差安衰暮。又得汝楊氏姑及汝叔母紇干。汝嫂劉新婦等同居。頗亦自適。但爲微有耳疾。大語方聞。行動飲食。幸無多恙。今大齊聖德遠被。特降鴻慈。既許歸吾于汝。又聽先致音耗。積稔長悲。豁然獲展。此乃仁侔造化。將何報德。汝與吾別之時。年尙幼小。以前家事。或不委曲。昔在武川鎮。生汝兄弟。大者屬鼠。次者屬兔。汝身屬蛇。鮮于修禮起日。吾之闔家大小。先在博陵郡。住相將欲向左人城。行至唐河之北。被定州官軍打敗。汝祖及二叔時俱戰亡。汝叔母賀拔及兒元寶。汝叔母紇干及兒菩提。并吾與汝六人同被擒捉。入定

州城未幾。間將吾及汝送與元寶掌。賀拔紇干各別分散。寶掌見汝云。我識其祖翁。形狀相似。時寶掌營在唐城內。經停三日。寶掌所掠得男。夫婦女可六七十人。悉送向京。吾時與汝同被送。限至定州城南。夜宿同鄉人姬庫根家。茹茹奴望見鮮于修禮營火。語吾云。我今走向至本軍。既至營。遂告吾輩在此。明日日出。汝叔將兵邀截吾及汝等。還得向營。汝時年十二。共吾并乘馬隨軍。可不記此事緣由也。于後吾共汝在受陽住。時元寶菩提及汝姑兒賀蘭盛洛並汝身四人同學。博士姓成爲人嚴惡。汝等四人謀欲加害吾與汝叔母等。聞之各捉其兒打之。惟盛洛無母。獨不被打。其後爾朱天柱亡歲。賀拔阿斗泥在關西。遣人迎家累。時汝叔亦遣奴來富迎汝及盛洛等。汝時著緋綾袍。銀裝帶。盛洛著紫織成纈通身袍。黃綾裹。並乘騾同去。盛洛小于汝。汝等三人並呼吾作阿摩敦。如此之事。當分明記之耳。今又寄汝小時所著錦袍表一領。至宜檢看。知吾含悲戚。多歷年祀。屬千載之運。逢大齊之德。矜老開恩。許得相見。一聞此言。死猶不朽。况如今者。勢必聚集。

禽獸草木。母子相依。吾有何罪。與汝分離。今復何福。還望見汝。言此悲喜。死而更蘇。世間所有。求皆可得。母子異國。何處可求。假汝位極王公。富過山海。有一老母。八十之年。飄然千里。死亡旦夕。不得一朝。暫見不得一日。同處寒不得汝衣。飢不得汝食。汝雖窮榮極盛。光耀世間。汝何用爲。于吾何益。吾今日之前。汝旣不得申其供養。事往何論。今日以後。吾之殘命。惟繫于汝。爾戴天履地。中有鬼神。勿云冥昧。而可欺負。汝楊氏姑。今雖炎暑。猶能先發。關河阻遠。隔絕多年。書依常體。慮汝致惑。以是每存款質。兼亦載吾姓名。當識此理。勿以爲怪。

北周宇文護報母閤姬書

區宇分崩。遭遇災禍。違離膝下。三十五年。受形稟氣。皆知母子。誰同薩保。如此不孝。宿殃積戾。惟應賜鍾。豈悟網羅。上嬰慈母。但立身立行。不負一物。明神有識。宜見哀憐。而子爲公侯。母爲俘隸。熱不見母。熱寒不見母。寒衣不知。有無食不知。飢飽。泯如天地之外。無由暫聞。晝夜悲號。繼之以血。分懷冤酷。終此一生。死若知。

冀奉見于泉下。爾不謂齊朝解網。惠以德音。摩敦四姑並許矜放。初聞此旨。魂爽
飛越。號天叩地。不能自勝。四姑卽蒙禮送平安入境。以今月十八日于河東拜見。
遙奉顏色。崩動肝腸。但離絕多年存亡阻隔。相見之始。口未忍言。惟敘齊朝寬弘。
每存大德。云與摩敦雖處宮禁。常蒙優禮。今者來鄴。恩遇彌隆。矜哀聽許。摩敦垂
敕。曲盡悲酷。備述家事。伏讀未周。五情屠割。書中所道無事。敢忘摩敦年尊。又加
憂苦。常謂寢膳貶損。或多遺漏。伏奉論述次第。分明一則以悲。一則以喜。當鄉里
破敗之日。薩保年已十餘歲。鄰曲舊事。猶自記憶。況家門禍難。親戚流離。奉辭時
節。先後慈訓。刻肌刻骨。常纏心腑。天長喪亂。四海橫流。太祖乘時。齊朝撫運。兩河
三輔。各值神機。原其事跡。非相負背。太祖升遐。未定天保。薩保屬當。猶子之長。親
受顧命。雖身居重任。職當憂責。至于歲時。稱慶子孫。在庭顧視。悲摧心情。斷絕胡
顏。履戴負愧。神明霈然之恩。旣以霑洽。愛敬之至。施及傍人。草木有心。禽魚感澤。
況在人倫。而不銘戴。有家有國。信義爲本。伏度來期。已應有日。一得奉見。慈顏永

畢生願生死肉骨豈過今恩負山戴岳未足勝荷二國分隔理無書信主上以彼朝不絕母子之恩亦賜許奉答不期今日得通家問伏紙鳴咽言不宣心蒙寄薩保別時所留錦袍表年歲雖久宛然猶識抱此泣悲至于拜見事歸忍死知復何心。

隋薛濬遺弟書

吾以不造幼丁艱酷窮遊約處屢絕簞瓢晚生早孤不聞詩禮賴奉先人貽厥之訓獲稟母氏聖善之規負笈裹糧不憚艱遠從師就業欲罷不能砥行厲心困而彌篤服膺教義爰至長成自釋耒登朝于茲二十三年矣雖官非聞達而祿喜逮親庶保期頤得終色養何圖精誠無感禍酷薦臻兄弟俱被奪情苦廬靡申哀訴是用扣心泣血靈氣推魂者也既而瘡巨釁深不勝荼毒啟手啟足幸及全歸使夫死而有知得從先人于地下矣豈非至願哉但念爾伶俜孤宦遠在邊服顧此恨恨如何可言適已有書冀得與汝面訣忍死待汝已歷一旬汝既未來便成今

古。緬。然。永。別。爲。恨。何。言。勉。之。哉。勉。之。哉。

唐駱賓王上吏部裴侍郎書

四月一日武功縣主簿駱賓王謹再拜奉書吏部侍郎裴公執事。易曰：書不盡言，言不盡意。然則義在乎象，非書無以達其微；辭隱乎情，非言無以筌其旨。僕誠鄙人也，頗覽前事。每讀書，見高堂九仞，曾參起北向之悲；積粟萬鍾，季路有南遊之歎。未嘗不廢書輟卷，流涕沾襟。何者？情蓄於衷，事符則感，形潛於內，迹應斯通。是用布腹心，瀝肝膽。庶大雅含弘之量，矜小人惻款之誠。惟君侯察焉。賓王一藝罕稱，十年不調。進寡金張之援，退無毛薛之遊。亦何嘗獻策干時，高談王霸。銜才揚己，歷詆公卿。不汲汲於榮名，不戚戚於卑位。蓋養親之故也。豈謀身之道哉。不圖君侯忽垂過聽，禮以弓招之恩，任以書記之事。擬人卽多慙阮瑀，入幕則高謝郗超。夫聶政、荊軻、刺客之流也。田光、豫讓、烈士之分也。咸以勢利相傾，意氣相許。尙且捐軀燕趙，甘死秦韓。今君侯無求於下，官見接以國士，當陪麾後殿，奉節前驅。

賈餘勇以求榮效。輕生而報施。所以逡巡於成命。躊躇於從事者。徒以夙遭不造。幼丁閔凶。老母在堂。常嬰羸恙。藜藿無甘。旨之膳松檟。闕遷厝之資。撫躬存亡。何心天地。故寢食夢想。噬指之戀。徒深歲時。蒸嘗崩心之痛。罔極。若僕者。固名教中一罪人耳。何面目以奉三軍之士乎。況屬天倫之喪。奄踰七月。違膝下之養。忽以三年而凶服之制。將終哀痛之情。未洩。興言永慕。舉目增傷。夫怨於衷者。哀聲可以應木石。感於情者。至性可以通神明。故徐元直指心以求辭。李令伯陳情以窮訴。上以棄興王之佐。命下以全奉親之篤。誠而蜀主不以爲非。晉君待之愈厚。此二人者。豈貪貧賤。惡榮華。厭萬乘之交。甘匹夫之辱也。蓋有不得已者哉。儻有乾沒爲心。脂韋成性。捨慈親之色。養許明主。以驅馳內忘。顧復之私。外存傳會之眷。薄骨肉。厚榮寵。苟背恩以自效。則君侯何以處之。且義士期乎貞夫。忠臣出乎孝子。旣不能推心以奉母。亦焉能死節以事人。假物議之。無嫌實吾斯之。未信也。流沙一去。絕塞千里。子愴入塞之魂。母切倚閭之望。就令歡以卒歲。仰南薰之不貲。

而使憂能傷人。迫西山而何幾。君侯情深錫類。道叶天經。明恕待人。慈心應物。儻矜犬馬之微願。憫烏鳥之私情。寬其負恩。遂其終養。則窮魂有望。老母知歸。賓王死罪再拜。

唐韓愈與李翱書

使至辱足下書。歡愧來并。不容於心。嗟乎。子之言意皆是也。僕雖巧說。何能逃其責耶。然皆子之愛我。多重我厚。不酌時人待我之情。而以子之待我之意。使我望於時人也。僕之家本窮空。重遇攻劫。衣服無所得。養生之具無所有。家累僅三十口。攜此將安所歸。託乎捨之入京。不可也。挈之而行。不可也。足下將安以爲我謀哉。此一事耳。足下謂我入京。誠有所益乎。僕之有子。猶有不知者。時人能知我哉。持僕所守。驅而使奔走伺候公卿間。開口論議。其安能有以合乎。僕在京城八九年。無所取資。日求於人以度時月。當時行之不覺也。今而思之。如痛定之人。思當痛之時。不知何能自處也。今年加長矣。復驅之使就其故地。是亦難矣。所貴乎京

師者不以明天子在上賢公卿在下布衣韋帶之士談道義者多乎以僕違違于其中能上聞而下達乎其知我者固少知而相愛不相忌者又加少內無所資外無所從終安所爲乎嗟乎子之責我誠是也愛我誠多也今天下之人有如子者乎自堯舜以來士有不遇者乎無也子獨安能使我潔清不污而處其所可樂哉非不願爲子之所云者力不足勢不便故也僕於此豈以爲大相知乎累累隨行役役逐隊饑而食飽而嬉者也其所以止而不去者以其心誠有愛於僕也然所愛於我者少不知我者猶多吾豈樂於此乎哉將亦有所病而求息於此也嗟乎子誠愛我矣子之所責於我者誠是矣然恐子有時不暇責我而悲我不暇悲我而自責且自悲也及之而後知履之而後難耳孔子稱顏回一簞食一瓢飲人不堪其憂回也不改其樂彼人者有聖者爲之依歸而又有簞食瓢飲足以不死其不憂而樂也豈不易哉若僕無所依歸無簞食無瓢飲無所取資則餓而死其不亦難乎子之聞我言亦悲矣嗟乎子亦慎其所之哉離違久乍還侍左右當日懽

喜故專使馳此候足下意并以自解。

宋蘇軾謝張太保撰先人墓碣書

軾頓首再拜。伏蒙再示先人墓表。特載辨姦一篇。恭覽涕泗。不知所云。竊惟先人早歲汨沒。晚乃有聞。雖當時學者知師尊之。然於其言語文章。猶不能盡。而況其中之不可形者乎。所謂知之盡而信其然者。舉世惟公一人。雖若不幸。然知我者希。正老氏之所貴。辨姦之始作也。自軾與舍弟皆有嘻其甚矣之諫。不論他人。獨明公一見。以爲與我意合。公固已論之先朝。載之史冊。今雖容有不知。後世決不可沒。而先人之言。非公表而出之。則人未必信。信不信。何足深計。然使斯人用區區小數。以欺天下。天下莫覺。莫知恐後。世必有秦無人之歎。此墓表之所以作。而軾之所以流涕再拜而謝也。黃叔度澹然無作。郭林宗一言。至今以爲顏子。林宗於人材。小大畢取。所賢非一人。而叔度之賢。無一見於外者。而後世猶信。徒以林宗之重也。今公之重。不減林宗。所賢惟先人。而其心迹粗若可見。其信於後世必

矣。多言何足爲謝。聊發一二。

宋曾鞏謝杜相公書

伏念昔者方鞏之得禍。罰於河濱。去其家四千里之遠。南嚮而望。迅河大淮。埭堰湖江。天下之險。爲其阻阨。而以孤獨之身。抱不測之疾。熒熒路隅。無攀緣之親。一見之舊。以爲之託。又無至行上之可以感人。利勢下之可以動俗。惟先人之醫藥。與凡喪之所急。不知所以爲賴。而旅櫬之重大。懼無以歸者。明公獨於此時。閔閔勤勤。營救護。眎親屈車騎。臨於河上。使其方先人之病。得一意於左右。而醫藥之有與謀。至於旣孤。無外事之奪其哀。而毫髮之私。無有如其欲。莫大之喪。得以卒致而南。其爲存全之恩。過越之義。如此。竊惟明公相天下之道。吟誦推說者。窮萬世。非如曲士汲汲一節之善。而位之極。年之高。天子不敢煩以政。豈鄉閭新學。危苦之情。叢細之事。宜以徹於眎聽。而蒙省察。然明公存先人之故。而所以盡於鞏之德。如此。蓋明公雖不可起。而寄天下之政。而愛育天下之人材。不忍一夫失。

其所之道出於自然推而行之不以進退而鞏獨幸遭明公於此時也在喪之日不敢以世俗淺意越禮進謝喪除又惟大恩之不可名空言之不足陳徘徊迄今一書之未進顧其慚生於心無須臾廢也伏惟明公終賜亮察夫明公存天下之義而無有所私則鞏之所以報於明公者亦惟天下之義而已誓心則然未敢謂能也

宋曾鞏寄歐陽舍人書

鞏頓首載拜舍人先生去秋人還蒙賜書及所撰先大父墓碑銘反覆觀誦感與慚并夫銘誌之著於世義近於史而亦有與史異者蓋史之於善惡無所不書而銘者蓋古之人有功德材行志義之美者懼後世之不知則必銘而見之或納於廟或存於墓一也苟其人之惡則於銘乎何有此其所以與史異也其辭之作所以使死者無有所憾生者得致其嚴而善人喜於見傳則勇於自立惡人無有所紀則以媿而懼至於通材達識義烈節士嘉言善狀皆見於篇則足爲後法警勸

之道。非近乎史。其將安近。及世之衰。人之子孫者。壹欲褒揚其親。而不本乎理。故雖惡人。皆務勒銘。以誇後世。立言者既莫之拒。而不爲。又以其子孫之所請也。書其惡焉。則人情之所不得。於是乎銘始不實。後之作銘者。當觀其人。苟託之非人。則書之。非公與。是則不足以行世。而傳後。故千百年來。公卿大夫。至於里巷之士。莫不有銘。而傳者蓋少。其故非他。託之非人。書之非公與。是故也。然則孰爲其人。而能盡公與。是歟。非畜道德。而能文章者。無以爲也。蓋有道德者。之於惡人。則不受。而銘之於衆人。則能辨焉。而人之行。有情善而迹非。有意奸而外淑。有善惡相懸。而不可以實指。有實大於名。有名侈於實。猶之用人。非畜道德者。惡能辨之。不惑。議之不徇。不惑。不徇。則公且是矣。而其辭之不工。則世猶不傳。於是又在其文章兼勝焉。故曰。非畜道德。而能文章者。無以爲也。豈非然哉。然畜道德。而能文章者。雖或並世而有。亦或數十年。或一二百年。而有之。其傳之難如此。其遇之難又如此。若先生之道德文章。固所謂數百年而有者也。先祖之言行卓卓。幸遇而得。

銘其公與是其傳世行後無疑也。而世之學者每觀傳記所書古人之事。至其所可感則往往盡然不知涕之流落也。況其子孫也哉。況鞏也哉。其追晞祖德而思所以傳之之繇。則知先生推一賜於鞏。而及其三世其感與報宜若何而圖之。抑又思若鞏之淺薄滯拙。而先生進之。先祖之屯蹶否塞以死。而先生顯之。則世之魁閎豪傑不世出之士。其誰不願進於門。潛遁幽抑之士。其誰不有望於世。善誰不爲而惡誰不愧。以懼爲人之父祖者。孰不欲教其子孫爲人之子孫者。孰不欲寵榮其父祖。此數美者一歸於先生。旣拜賜之辱。且敢進其所以然。所諭世族之次。敢不承教而加詳焉。愧甚不宣。鞏再拜。

清洪亮吉與孫季逵書

季逵足下。僕遠閱千里。不覩一士。日惟陳書。頽仰宇宙。夜或秉燭。驅役魂夢。昨已冬始寒。尤逼人狂風。一來吹卷。出戶稍遲。未覓已過牆外。南鄰朽桑。蟲厚逾寸。敗葉旣盡。時來嚙人車聲。過巷牀几。皆動土旣不實。倏陷窟穴。離離黃蒿。乃長屋角。

閒塵積。畝反不生。草地幸稍遠。掩戶避客。偶出酬接。皆至失歡。一再以思。未識何故。計念足下。顧戀墳墓。思遂南歸。寄跡丙舍。而田不滿頃。松才盈寸。溝水未活。谿橋不成。以此數事。尙遲年載。當復移家近冢。就姊謀居。對鶻營。巢徒魚。築宅。林花悅魂。水鳥養性。招邀耆童。呵叱鄰狗。一廛之外。更築生壙。門皆東開。易見日月。穴必西向。暱就父母。松陰一樹。承以梅株。魚田半頃。圍此蟹。斷更望足下。能來同之。當於屋旁。爲構數室。瞻身之具。取給園蔬。歸魂之棺。仰此林木。時直霜露。言羅雞豚。祀親之餘。謀以醉客。如此數歲。卽復奄忽。良可不恨。嗟乎。積瘁之士。寡至四十者。況開篋而視。已有傳書入隧。以觀全具。骨肉後世。知我不詳。何人及身。而思惟有足下。自非親暱。誰能深言。勉謀殮饗。幸蓄光彩。

清汪中與劍潭書

正月二十四日。中白。足下以孤子爲母氏所成就。克有聞於世。凡其相習者。與之言。則必及其母。凡其有文者。則必求爲之述其母。記曰。君子之所謂孝也者。國人

稱願然曰幸哉有子如此可謂孝也已其子之謂歟雖然子之所望於人者不過
狀嫠室之艱貞。絃生我之勞瘁。當世號爲女宗。國史懷其舊俗。如是而止矣。竊以
爲虛文無濟。未足以充子之志也。以中所見。大抵爲寡婦者。必壽其子。苟成也。則
家必昌。雖貧也。必孝。此天道之可知者。然當始孤之日。蒙穉無知其親。血氣堅壯
疾疢不作。而飢寒愁痛。斲削萬端。使不得一日遂其性。泊其子成人。授室門戶。再
造之日。方思從容頤養。以娛暮年。而精力奄亡。恭然槁木。蔭苓梁肉。無補于既敝
之身。是憂患之日。則其親既當之。而以傷其生。安樂之日。則妻子僕妾。皆得與享
之。而親轉不能堅其命。豈非生人之至痛哉。是雖日用三牲之養。曾不若及其壯
而日一再食之爲美也。孟子曰。鰥寡孤獨。天下之窮民而無告者。文王發政施仁。
必先此四者。然吾觀先王之世。耆老孤子。則司門遺人。得以委積財物。養之。惟寡
婦無聞。故大田多稼。至於遺秉滯穗。始得取之以爲利。而夫死妻穉。子幼。無大功
之親。於是同居不同居。繼父之服。豈非人道之窮。雖聖人亦不能事爲之制歟。

議曰。凡州縣察其寡婦之無依者。造屋一區。爲百間。閒各戶使居之。命之曰貞苦堂。外爲門。有守門者。門左爲塾。凡其兄弟親戚之男子來省者。待於其所以。其名族召之。則出見之。非是不得入。婦有姑若子女三人者。月給米一石。錢二百。終歲綿六斤。布五匹。其多少以是爲差。任以女工絲枲之事。而酬其直。門右爲庫。有主藏者。非六十以上不得充。主門者亦如之。擇鄉大夫之敦篤有智者。總其事。出入贏縮之節。官吏不得問焉。門外爲社。有師一人。凡孤子五歲至十歲者學焉。命之曰孤兒社。三年視其材分志趣。而分授以四民之業。然而必通孝經解字體。至十六。度能自食其力。以次減其廩。至二十。則舉而遷之於外。其賢者能者。旣老則使掌其堂之事。各修其業。以教社之子弟。其富且貴者。十分其貲而三入之堂。訖於其身。凡民雜犯自杖以下。視其輕重而要之。使入其財於堂。遠鄉若有屋不入堂者。聽之。廩之如在堂者。此其大略也。其它損益之。惟其人。是故哀苦蕉萃之狀。日聚而相習。則夜哭之感不生。而從一以終者衆矣。少蓄其力。則老而不衰。而孝子。

得。以。終。其。養。矣。幼。有。所。長。而。督。之。以。恆。業。則。夫。人。思。自。奮。而。材。智。出。矣。國。家。法。紀。明。備。百。度。具。舉。若。養。濟。院。育。嬰。堂。漏。澤。園。蓋。皆。養。生。送。死。恤。老。慈。幼。以。周。萬。民。艱。阨。也。惟。茲。堂。之。設。而。風。化。以。厲。人。材。以。起。又。非。徒。哀。其。煢。獨。而。已。往。乾。隆。丙。子。桂。林。陳。公。巡。撫。江。蘇。屬。年。飢。命。節。婦。之。貧。者。親。族。共。周。恤。之。以。全。其。操。誠。大。臣。之。言。矣。然。是。時。吾。母。子。方。流。離。乞。食。而。三。族。之。富。人。無。問。者。無。亦。文。告。之。感。人。者。淺。歟。吾。子。志。之。它。日。得。志。或。行。之。一。府。一。縣。使。四。方。以。爲。法。或。告。於。上。而。頒。之。天。下。以。爲。令。典。使。經。世。大。法。詩。書。所。載。三。代。聖。王。之。所。不。及。而。今。日。行。之。後。世。考。其。良。法。善。政。而。曰。自。汪。某。之。爲。其。母。始。惟。其。母。之。賢。以。至。於。是。則。所。以。貽。之。令。名。者。豈。有。既。哉。詩。曰。孝。子。不。匱。永。錫。爾。類。記。曰。博。施。備。物。可。謂。不。匱。矣。夫。是。之。謂。大。孝。是。謂。得。人。之。歡。心。以。事。其。親。吾。子。勉。之。中。懷。斯。痛。劇。於。常。人。自。以。放。廢。之。身。有。母。且。不。能。養。天。地。一。罪。人。耳。鬱。鬱。之。心。敢。以。望。之。足。下。凡。孤。子。之。得。行。其。志。者。並。以。告。焉。使。當。世。不。獨。有。能。爲。是。言。者。則。幸。矣。中。白。

清李慈銘與柯山親友書

入春十七日。得去秋七月所寄書。亂後三年。始獲此尺素。回環細讀。無閒晤言。兄之一生。輕信易惑。又本無才能。而思用世。以此蹉跌。遂致魅乘其暗。蟻射其明。破家棄親。幾負世之大詬。甚可痛也。少緣綺語。頓錮豔情。閨房之好。稍異於大馮。媵侍之選。懸擬乎小杜。春黯黯。其花寂。秋落。而月孤。歲時不留。倏過年少。桑榆之蔭。漸斜。蘭芷之芳。無歇。足下招我歸。欲兄急了此願。意良厚也。而兄白首耶。署出則裘敝。歸則壁立。問亂後之桃源。尋劫餘之柳絮。豈易言乎。今年上春。本擬南返。牽於世事。遂違曩心。自屆春分。以及上巳。每念吾越。常禧迎恩之郊。東郭南門之外。景物豐麗。殆絕人寰。山浮翠鮮。水拭綠淨。港町林抱。村墅花接。唳鳥引響。浴鵝成羣。畫船碧篷。出明妝以宛宛。酒樓青幟。招游屐而傲傲。路沿紙鳶之風。渠放秧馬之水。柳岸吹碧。時露半帆。菜畦疊黃。晴欹萬笠。簫鼓達乎月。出城郭。迥其烟浮。蓋離家以來。思之輒病。及病之際。又思之輒瘳。雖滄桑頓移。而夢寐不改。都中二

月草無一青。所不異者。煖風遲日耳。比已定計。俟八月下旬。束裝泛海。直下申江。重陽前後。必可抵里。當與足下泛小艇。束短筇。載柯谿之紫菱。訪蘿菴之黃葉。射雉七巖。釣魚五橋。沽曇釀新酒。采湖洋老蓴。問菊州山。臥楓丁港。清旭而出。落日而歸。鐙火出籬。雞豚在柵。奉兩家之高堂。聚中外之弟妹。別後面目。各言瘦肥。劫餘蒼黃。互相慰幸。數戚屬之多。故則涕淚閒作。喜骨肉之重聚。則婢僕皆歡。鄰里賀歸。或度牆以供饌。兒童解事。亦扶牀而不眠。話京國之見聞。朝事歷歷。譚陵谷之變怪。鬼燐幽幽。茗苴一甌。芋栗數器。直至打稻聲歇。然松燄殘。月苦霜濃。各散就寢。縱閒居之福。勢難久長。而省侍之娛。時爲極樂。已知足下遲我甚殷。故先書此以報。惟努力彊飯。蓄暇相待。不宣。

(已)側豔

法豔 關雎之詠。以求淑女。草蟲之詩。以思君子。夫婦爲人倫之首。國風

存好色之文。匪若後世之談香奩。矜麗體者倫也。漢魏六朝。間存古製。有好事者。仿孝穆玉臺之集。輯爲一編。藝林盛業。跂予望之。錄徐淑以下文凡七首。

漢徐淑答夫秦嘉書

知屈珪璋。應奉藏使。策名王府。觀國之光。雖失高素皓然之業。亦是仲尼執鞭之操也。自初承問。心願東還。迫疾惟宜。抱歎而已。日月已盡。行有伴例。想嚴莊已辦。發邁在近。誰謂宋遠。企予望之。室邇人遐。我勞如何。深谷逶迤。而君是涉。高山巖巖。而君是越。斯亦難矣。長路悠悠。而君是踐。冰霜慘烈。而君是履。身非形影。何得動而輒俱。體非比目。何得同而不離。於是詠萱草之喻。以消兩家之思。割今者之恨。以待將來之歡。今適樂土。優游京邑。觀王都之壯麗。察天下之珍妙。得無目玩意移。往而不能出耶。

漢徐淑又報嘉書

既惠音令。兼賜諮物。厚顧慙慙。出於非望。鏡有文彩之麗。釵有殊異之觀。芳香既珍。素琴益好。惠異物於鄙陋。割所珍以相賜。非豐恩之厚。孰肯若斯。鏡覽執釵。情想髣髴。操琴詠詩。思心成結。敕以芳香馥身。喻以明鏡鑒形。此言過矣。未獲我心。

也。昔詩人有飛蓬之感。班婕妤有誰榮之歎。素琴之作。當須君歸明鏡之鑒。當待君還。未奉光儀。則寶釵不設也。未侍帷帳。則芳香不發也。今奉旄牛尾拂一枚。可以拂塵垢。越布手巾二枚。嚴器中物。幾具。金錯盃一枚。可以盛書。水琉璃盃一枚。可以服藥酒。

魏文帝答繁欽書

披書歡笑。不能自勝。奇才妙伎。何其善也。頃守宮王孫世有女曰瑣。年始九歲。夢與神通。寤而悲吟。哀聲急切。涉歷六載。于今十五。近者督將具以狀聞。是日戊午。祖于北園。博延衆賢。遂奏名倡。曲極數彈。歡情未逞。白日西逝。清風赴闌。羅幃徒祛。玄燭方微。乃令從官引內世女。須臾而至。厥狀甚美。素顏玄髮。皓齒丹脣。詳而問之。云善歌舞。於是振袂徐進。揚蛾微眺。芳聲清激。逸足橫集。衆倡騰游。羣賓失席。然后修容飾妝。改曲變席。激清角。揚白雪。接孤聲。赴危節。于是商風振條。春鷹度吟。飛霧成霜。斯可謂聲協鐘石。氣應風律。網羅韶濩。囊括鄭衛者也。今之妙舞。

莫巧于絳樹。清歌莫善于宋臆。豈能上亂靈祇。下變庶物。漂悠風雲。橫厲無方。若斯也哉。固非車子喉轉長吟。所能逮也。吾練色知聲。雅應此選。謹卜良日。納之閑房。

梁簡文帝答新渝侯和詩書

垂示三首。風雲吐于行間。珠玉生于字裏。跨躡曹左。含超潘陸。雙鬢向光。風流已絕。九梁插花。步搖爲古。高樓懷怨。結眉表色。長門下泣。破粉成痕。復有影裏細腰。令與真類。鏡中好面。還將畫等。此皆性情卓絕。新致英奇。故知吹簫入秦。方識來鳳之巧。鳴瑟向趙。始覩駐雲之曲。手持口誦。喜荷交并也。

梁何遜爲衡山侯與婦書

昔人遨遊洛汭。會遇陽臺。神仙髣髴。有如今別。雖帳前微笑。涉想猶存。而幄裏餘香。從風且歇。掩屏爲疾。引領成勞。鏡想分鸞。琴悲別鶴。心如膏火。獨夜自煎。思等流波。終朝不息。始知萋萋萱草。忘憂之言。不實團團輕扇。合歡之用。爲虛路邇人。

遐音塵寂絕。一日三秋不足爲。喻聊陳往翰。寧寫款懷。遲枉瓊瑤。慰其杼柚。

陳伏知道爲王寬與婦義安主書

昔魚嶺逢車。芝田息駕。雖見妖姪。終成揮忽。遂使家勝陽臺。爲歡非夢。人慚蕭史。相遇成仙。輕扇初開。欣看笑靨。長眉始畫。愁對離妝。猶聞徙佩。願長廊之未盡。尙分行幃。冀迴陌之難迴。廣攝金屏。莫令愁擁。恒開錦幔。速望人歸。鏡臺新去。應餘落粉。熏爐未徙。定有餘煙。淚滴芳衾。錦花長溼。愁隨玉軫。琴鶴恒驚。已覺錦水丹鱗。素書稀遠。玉山青鳥。仙使難通。綵筆試操。香牋遂滿。行雲可託。夢想還勞。九重千日。詎想倡家。單枕一宵。便如蕩子。當令照影。雙來一鸞。羞鏡勿使窺牕。獨坐嫦娥笑人。

北周庾信爲上黃侯世子與婦書

昔仙人導引。尙刻三秋。神女將梳。猶期九日。未有龍飛劍匣。鶴別琴臺。莫不銜怨。而心悲。聞猿而下淚。人非新市。何處尋家。別異邯鄲。那應知路。想鏡中看影。當不

含啼欄外將花。居然俱笑。分杯帳裏。卻扇牀前。故是不思。何時能憶。當學海神。逐潮風而來往。勿如織女。待填河而相見。

第六章 書牘之其餘各體

箸於竹帛謂之書。書之於版謂之牘。牘長一尺。或云尺一尺。牘之名。由此其昉。形若木笏。但不挫角。師古之說詳矣。其餘箋簡札帖諸名。咸自書牘孳乳。凡屬于書牘類者。體製匪一。綜述於此。曰箋。子目二。曰啓。子目六。曰帖。曰簡。曰奏。記。曰狀。曰札。曰疏。曰引。無子目。凡爲類九。爲子目八。其間凡施之君主者。均別入表奏類。

(甲) 箋

詩注箋。或作牋。說文。箋。表識書也。彥和云。牋者表也。表識其情也。後

漢之制。公府奏記。郡將奏牋。大抵古者自敵以上。此體爲宜。後世亦遂施之儕輩矣。茲本彥和之說。約以今名。析爲兩目。一曰陳述。敬而不懾。簡而無傲。庶幾上窺乎表者也。一曰議論。清美以惠其才。彪蔚以文其響。庶幾上睨乎書者也。凡文十

四首。

(一) 陳述 錄繁休伯以下凡八首

漢繁欽與魏太子牋

正月八日壬寅。領主簿臣欽。死罪死罪。近屢奉牋。不足自宣。頃諸鼓吹。廣求異妓。時都尉薛訪。車子年始十四。能喉嚨引聲。與笳同音。白上呈見。果如其言。卽日故共觀試。乃知天壤之所生。誠有自然之妙物也。潛氣內轉。哀音外激。大不抗。越細不幽。散聲悲舊。笳曲美常。均及與黃門鼓吹溫胡迭唱。迭和喉所發音。無不響應。曲折沈浮。尋變入節。自初呈試。中間二旬。胡欲傲其所不知。尙之以一曲。巧竭意匱。既已不能。而此孺子。遺聲抑揚。不可勝窮。優游轉化。餘弄未盡。暨其清激悲吟。雜以怨慕。詠北狄之遐征。奏胡馬之長思。悽入肝脾。哀感頑豔。是時日在西隅。涼風拂衽。背山臨谿。流泉東逝。同坐仰歎。觀者俯聽。莫不泣泣殞涕。悲懷慷慨。自左驥史。納審姐名。倡能識以來。耳目所見。僉曰詭異。未之聞也。竊惟聖體兼愛好奇。是以因賤。先白委曲。伏想御聞。必含餘懽。冀事速訖。旋侍光塵。寓目階庭。與聽斯

調宴喜之樂。蓋亦無量。欽死罪死罪。

魏吳質在元城與魏太子牋

臣質言。前蒙延納。侍宴終日。曜靈匿景。繼以華燈。雖虞卿適趙。平原入秦。受贈千金。浮觴旬日。無以過也。小器易盈。先取沈頓。醒寤之後。不識所言。卽以五日到官。初至承前。未知深淺。然觀地形。察土宜。西帶恆山。連岡平代。北隣柏人。乃高帝之所忌也。重以泚水。漸漬疆宇。喟然歎息。思淮陰之奇譎。亮成安之失策。南望邯鄲。想廉藺之風。東接鉅鹿。存李齊之流。都人士女。服習禮教。皆懷慷慨之節。包左車之計。而質闇弱。無以莅之。若乃邁德種恩。樹之風聲。使農夫逸豫於疆畔。女工吟咏於機杼。固非質之所能也。至於奉遵科教。班揚明令。下無威福之吏。邑無豪俠之傑。賦事行刑。資於故實。抑亦懍懍有庶幾之心。往者嚴助。釋承明之權。受會稽之位。壽王去侍從之娛。統東郡之任。其後皆克復舊職。追尋前軌。今獨不然。不亦異乎。張敞在外。自謂無奇。陳咸憤積。思入京城。彼豈虛談。夸論。誑曜世俗哉。斯實

薄郡守之榮。顯左右之勤也。古今一揆。先後不買。焉知來者之不如今。聊以當觀。不敢多云。質死罪死罪。

晉劉柳薦周續之於太尉劉裕牋

臣聞恢耀和肆。必在兼城之寶。翼亮崇本。宜紓高世之逸。是以渭濱佐周。聖德廣運。商洛匡漢。英業乃昌。伏維明公道邁。振古應天。繼期游外。暢于冥內。體遠形於應近。雖汾陽之舉。輟駕于時艱。明揚之旨。潛感于窮谷矣。竊見處士雁門周續之。清真貞素。思學鉤深。弱冠獨往。心無近事。性之所遣。榮華與飢寒俱落。情之所慕。巖澤與琴書共遠。加以仁心內發。義懷外亮。留愛崑卉。誠著桃李。若升之宰府。必鼎味斯和。濯纓儒官。亦王猷遐緝。臧文不知。失在降賢。言偃得人。功由升士。願照其丹款。不以人廢言。

齊謝朓拜中軍記室辭隨王牋

眺聞潢汙之水。願朝宗而每竭。驚蹇之乘。希沃若而中疲。何則。臯壤搖落。對之惆

悵岐路東西。或以鳴邑。況乃服義。徒擁歸志。莫從。邈若墜雨。翩似秋蒂。眺實庸流。行能無算。屬天地休明。山川受納。哀采一介。抽揚小善。故得捨耒場圃。奉筆兔園。東亂三江。西浮七澤。契闊戎旃。從容讌語。長裾日曳。後乘載脂。榮立府庭。恩加顏色。沐髮晞陽。未測涯涘。撫臆論報。早誓肌骨。不悟滄溟。未運波臣。自蕩渤澥。方春旅翮。先謝清切。藩房寂寥。舊葦輕舟。反溯弔影。獨留白雲。在天龍門。不見去德。滋永思德。滋深。唯待青江可望。候歸艗于春渚。朱邸方開。效蓬心于秋實。如其簪履。或存衽席。無改。雖復身填溝壑。猶望妻子知歸。攬涕告辭。悲來橫集。

梁任昉到大司馬記室牋

記室參軍事。任昉死罪。死罪伏承。以今月令辰。肅膺典冊。德顯功高。光副四海。含生之倫。庇身有地。況昉受教君子。將二十年。咳唾爲恩。眄睐成飾。小人懷惠。顧知死所。昔承嘉宴。屬有緒言。提挈之旨。形乎善謔。豈謂多幸。斯言不渝。雖情謬先覺。而迹淪驕餌。湯沐具而非弔。大厦構而相賀。明公道冠二儀。勳超遂古。將使伊周。

奉轡桓文扶穀神功無紀。作物何稱。府朝初建。俊賢翹首。惟此魚目。唐突瓊璠。顧己循涯。實知塵忝。千載一逢。再造難答。雖則殞越。且知非報。不勝荷戴屏營之情。謹詣廳奉白牋謝聞。昉死罪死罪。

梁任昉百辟勸進今上牋

近以朝命蘊策。冒奏丹誠。奉被還命。未蒙虛受。搢紳顛顛。深所未達。蓋聞受金於府。通人之弘致。高蹈海隅。匹夫之小節。是以履乘石而周公不以爲疑。增玉璜而太公不以爲讓。況世哲繼軌。先德在民。經綸草昧。歎深微管。加以朱方之役。荆河是依。班師振旅。大造王室。雖累繭救。宋重胝存。楚居今觀。古曾何足。云而惑甚。盜鐘功疑。不賞皇天后土。不勝其酷。是以玉馬駿犇。表微子之去。金版出地。告龍逢之怨。明公據鞍輟哭。厲三軍之志。獨居掩涕。激義士之心。故能使海若登祗。罄圖效祉。山戎孤竹。束馬景從。伐罪弔民。一匡靖亂。匪叨天功。實勤濡足。且明公本自諸生。取樂名教。道風素論。坐鎮雅俗。不習孫吳。遘茲神武。驅盡誅之氓。濟必封之。

俗龜玉不毀。誰之功歟。獨爲君子。將使伊周何地。某等不達通變。實有愚誠。不任
慳款。悉心重謁。伏願時膺典冊。式副民望。

清洪亮吉出關與畢侍郎牋

自渡風陵。易車而騎。朝發蒲坂。夕宿鹽池。陰雲蔽虧。時雨凌厲。自河以東。與關內
稍異。土逼若術。塗危入棧。原林黯慘。疑披谷口之霧。衢歌哀怨。恍聆山陽之笛。日
在西隅。始展黃君仲則殯於運城西寺。見其遺棺七尺。枕書滿篋。撫其吟案。則阿
嬰之遺牋尙存。披其總帷。則城東之小史。旣去。蓋相如病肺。經月而難痊。昌谷嘔
心臨終。而始悔者也。猶復丹鉛狼藉。几案紛披。手不能書。畫之以指。此則杜鵑欲
化。猶振哀音。鷲鳥將亡。冀畱勁羽。遺棄一世之務。畱連身後之名者焉。伏念明公
生則爲營薄宦。死則爲卹衰親。復發德音。欲梓遺集。一士之身。玉成終始。聞之者
動容受之者。淪髓冀其遊岱之魂。感恩而西顧。返洛之旒。銜酸而東指。又況龔生
竟。天尙有故人。元伯雖亡。不無死友。他日傳公風義。勉其遺孤。風茲來禩。亦盛事

也。今謹上其詩。及樂府共四大册。此君平生與亮吉雅故。惟持論不同。嘗戲謂亮吉曰。予不幸早死。集經君訂定。必乖余之指趣矣。省其遺言。爲之墮淚。今不敢輒加朱墨。皆封送閣下。暨與述菴廉使。東友侍讀。共刪定之。卽其所就。已有足傳方乎古人。無愧作者。惟草稿皆其手寫。別無副本。梓後。尙望付其遺孤。以爲手澤耳。亮吉十九日已抵潼關。馬上率啟不宣。

清李慈銘與馬中丞牋

自謁旌麾。倏更春夏。結念馳企。無間寢興。惟茂績日崇。燕寢多福。士女歌祝。上系於興居。蠶麥丰昌。仰測夫霖雨。慈生旣善病。性復戒游。以故吟釣之文。罕通於郵牘。山野之屐。莫接於鈴扉。雖晉公愛才。遠徵居易。而司勳多嬾。鮮就奇章。宥其疎狂。是惟知我。然從公得食。固干乞之羞。而以力自備。亦束修之素。慈於執事。勢位甚懸。性分素定。故無平生之雅。而有相得之歡。形迹旣捐。肺附可罄。慈文字之外。本無一長。泉石所耽。更絕它嗜。而賦命窮薄。累邁艱屯。陋巷之屋。悉燬於賊烽。下

撰之田。又荒於潦。歲先人時祭。未得寧居。老母餘年。難營半飽。近欲於湖塘邨畔。賃宅一椽。月索千錢。竟未諧價。門前夏水。空約鷗鳧。屋外青山。只看圖畫。漁莊晚爨。稚子見而心歎。秧歌遠風。家人聞而生歎。比將過節。更困索逋。塵積破廚。鼃魚共其井。溜月入壞壁。蚊蠅鬧於帷幃。慈亦知越中士風。以請託爲生涯。以聲勢爲貨殖。關說之利。捷於得鼻。縣令之門。速於登壘。林下因以致富。山中甚於居奇。客異廬仝。昌黎聽其起滅。人非杜密。王昱以爲重輕。肥瘠互岐。高下相挾。而平生多癖。改行爲難。寧被劉勝寒蟬之嘲。不學王陽點金之術。尙維執事。向枯鱗於旱谷。返窮翼於寒柯。爲謀濫竽。令足自食。庶得一樓栖隱。十畝奉親。雨屐風蓬。略究閒居之事。水邊山隙。小營讀書之堂。沙鳥爲鄰。烟波接席。晚菘新稻。馨白華之餐。種樹植援。過黃楊之閏。是惟厚賜。豈曰能忘。冒瀆主臣。伏維涵鑒。

(二) 議論

錄楊德祖以下凡六首

漢楊脩答臨淄侯牋

脩死罪死罪。不待數日。若彌年載。豈由愛顧之隆。使係仰之情深邪。損辱嘉命。蔚矣其文。誦讀反覆。雖諷雅頌。不復過此。若仲宣之擅漢表。陳氏之跨冀域。徐劉之顯青豫。應生之發魏國。斯皆然矣。至於脩者。聽采風聲。仰德不暇。自周章於省覽。何遑高視哉。伏惟君侯少長貴盛。體發旦之資。有聖善之教。遠近觀者。徒謂能宣昭懿德。光贊大業而已。不復謂能兼覽傳記。留思文章。今乃含王超陳。度越數子矣。觀者駭視而拭目。聽者傾首而竦耳。非夫體通性達。受之自然。其孰能至於此乎。又嘗親見執事。握牘持筆。有所造作。若成誦在心。借書於手。曾不斯須。少留思慮。仲尼日月。無得踰焉。脩之仰望。殆如此矣。是以對鶡而辭。作暑賦。彌日而不獻。見西施之容。歸憎其貌者也。伏想執事不知其然。猥受顧錫。教使判定。春秋之成。莫能損益。呂氏淮南。字直千金。然而弟子箝口。市人拱手者。聖賢卓犖。固所以殊絕凡庸也。今之賦頌。古詩之流。不更孔公風雅。無別耳。脩家子雲。老不曉事。強著一書。悔其少作。若比仲山周旦之儔。爲皆有譽邪。君侯忘聖賢之顯迹。述鄙宗之

過言竊以爲未之思也。若乃不忘經國之大美。流千載之英聲。銘功景鐘。書名竹帛。斯自雅量素所蓄也。豈與文章相妨害哉。輒受所惠。竊備矇眚。誦詠而已。敢望惠施。以忝莊氏。季緒瓌瓌。何足以云。反答造次。不能宣備。脩死罪死罪。

漢陳琳答東阿王牋

琳死罪死罪。昨加恩辱命。并示龜賦。披覽粲然。君侯體高世之才。秉青萍干將之器。拂鐘無聲。應機立斷。此乃天然異稟。非鑽仰者所庶幾也。音義既遠。清辭妙句。焱絕煥炳。譬猶飛兔流星。超山越海。龍驥所不敢追。況於駑馬。可得齊足。夫聽白雪之音。觀綠水之節。然後東野巴人。蚩鄙益著。載懽載笑。欲罷不能。謹韞櫝玩耽。以爲吟頌。琳死罪死罪。

清龔自珍與江子屏牋

大著讀竟。其曰國朝漢學師承記。名目有十。不安焉。改爲國朝經學師承記。敢貢其說。夫讀書者寔事求是。千古同之。此雖漢人語。非漢人所能專。一不安也。本朝

自有學。非漢學。有漢人稍開門徑。而近加邃密者。有漢人未開之門徑。謂之漢學。不甚甘心。不安。二也。瑣碎。餽釘。不可謂非學。不得爲漢學。三也。漢人與漢人不同。家各一經。經各一師。孰爲漢學乎。四也。若以漢與宋爲對峙。尤非大方之言。漢人何嘗不談性道。五也。宋人何嘗不談名物訓詁。不足概服宋儒之心。六也。近有一類人。以名物訓詁爲盡聖人之道。經師收之。人師擯之。不忍深論。以誣漢人。漢人不受。七也。漢人有一種風氣。與經無與。而附於經。謬以裨竈梓慎之言爲經。因以汨陳五行。矯誣上帝。爲說經大易。洪範。身無完膚。雖劉向亦不免。以及東京內學。本朝何嘗有此惡習。本朝人又不受矣。八也。本朝別有絕特之士。涵詠白文。剋獲於經。非漢。非宋。亦惟其是而已矣。方且爲門戶之見者所擯。九也。國初之學。與乾隆初年以來之學不同。國初人卽不專立漢學門戶。大旨欠區別。十也。有此十者。改其名目。則渾渾圓圓。無一切語弊矣。自珍頓首。丁丑冬至日。

清龔自珍與人箋

客言足下始工於文詞。近習考訂。僕豈願通人受此名哉。又云足下既習考訂。亦兼文詞。又豈願通人受此名哉。足下示吾近勇去口吻之冶俊。爲汪洋鬱栗冲夷。是文章之祥也。而頗熹雜陳枚舉。夫一二瑣故。以新名其家。則累矣。累矣。古人文學同驅。並進於一物。一名之中。能言其大本大原。而究其所終極。綜百氏之所譚。而知其義例。徧入其門徑。我從而筦鑰之。百物爲我隸用。苟樹一義。若渾渾圓矣。則文儒之總也。

清龔自珍與人箋二

少習名家言。亦有用。居亭主獷獷嗜利。論事則好爲狠刻。以取勝。中實無主。野火之發。無司燧者。百里易滅也。某公端端醉後。見疎狂。殆眞狂者。某君借疎狂以行。其世故。某君效爲駮穉。以行其老詐。某一席之義。前後不相屬。能勸說而無線索。貫之慮。不壽朝士。方貴。亦作牢騷言。政是酬應我曹耳。善忌人者。術最多。品最雜。最工者。乃借風勸忠厚。以濟勑而行。伐使受者傷心。而外不得直。驚名之士。如某

君孤進宜憫諒也。某童子妍黠萬狀志賣長者奸而不雄死而謚愍悼者哉。

清龔自珍與人箋三

吾子改之。坦夷酣嬉於人人以機械至。吾子覺大恨。婁受侮。吾子必改之道。無畦者。事有闕也。中無險者。貌有畔也。與之爲無滓。無擇。又不制於外。吾子必受侮矣。言難則聽者重。步難則與遊者重。愛憎難則受者重。重則不予侮。乃全吾愛。書曰。剛而無虐。簡而無傲。論語曰。君子敬而無失。與人恭而有禮。四海之內皆兄弟也。從吾子之行。必且曰。恭敬爲僞薄。胡不與人坦夷而酣嬉。市人之兄弟異乎。士大夫之所聞。纖夫佻人當吾前。而不有忌憚。君子深恥之。曰。我之不足忌。彼窺之矣。

(乙)啟 通俗文云。官信曰啟。釋名。啟詣也。以啟語官司所至詣也。古者軍在前曰啟。在後曰殿。意者上書先容。義等執贄乎。大唐創業起居注。載帝自手疏與突厥書。署名某啟。所司報請。改啟爲書。則施之自敵以上。義可概見。然昭明十二月啟。翫其語意。問訊朋儔。此其不同者也。後世又有公啟。施之泛博之人。則又無

分上下已。茲析爲六目。曰感慕。曰陳述。曰干謁。曰達謝。曰致賀。曰公啟。綜而甄之。其諸在藏弄之列者與。凡文三十五首。

(一) 感慕 錄昭明太子以下凡四首。

梁蕭統十二月啟

伏。以。北。斗。周。天。送。玄。英。之。故。節。東。風。拂。地。啓。青。陽。之。芳。辰。梅。花。舒。兩。歲。之。裝。柏。葉。汎。三。光。之。酒。飄。飆。餘。雪。入。簫。管。而。成。歌。皎。潔。清。冰。對。蟾。光。而。寫。鏡。敬。想。足。下。神。遊。書。帳。性。縱。琴。堂。談。叢。發。流。水。之。源。筆。陣。引。崩。雲。之。勢。昔。時。文。會。長。思。風。月。之。交。今。日。言。離。永。歎。參。商。之。隔。但。某。執。鞭。賤。品。耕。鑿。庸。流。沈。形。南。畝。之。間。滯。迹。東。臯。之。上。長。懷。盛。德。聊。吐。愚。衷。謹。憑。黃。耳。之。傳。佇。望。白。雲。之。信。

太簇正月

伏。以。節。應。佳。辰。時。登。令。月。和。風。拂。迴。淑。氣。浮。空。走。野。馬。於。桃。源。飛。少。女。於。李。徑。花。明。麗。月。光。浮。寶。氏。之。機。鳥。弄。芳。園。韻。響。王。喬。之。館。敬。想。足。下。優。游。泉。石。放。曠。煙。霞。尋。五。柳。之。先。生。琴。尊。雅。興。謁。孤。松。之。君。子。鸞。鳳。騰。翔。成。萬。世。之。良。規。寶。百。年。之。令。

範。但某席戶幽人。蓬門下客。三冬勤學。慕方朔之雄才。萬卷常披。習鄭玄之逸氣。既而風塵頓隔。仁智並乖。非無衰侶之憂。誠有離羣之恨。謹伸數字。用寫寸誠。鐘夾

月二

伏以景逼徂春。時臨變節。啼鶯出谷。爭傳求友之音。翔藁飛林。競散佳人之鱗。魚游碧沼。疑呈遠道之書。燕語雕梁。狀對幽閨之語。鶴帶雲而成蓋。遙籠大夫之松。虹跨澗以成橋。遠現美人之影。對茲節物。寧不依然。敬想足下。聲馳海內。名播雲間。持郭璞之毫鸞。詞場月白。吞羅含之彩鳳。辯囿日新。某山北逸人。牆東隱士。龍門退水。望冠冕以何年。鷓路頽風。志簪纓於幾載。既違語默。且阻江湖。聊寄八行

之書。代申千里之契。

姑洗三月

節。屆朱明。晷鍾丹陸。依依聳蓋。俱臨帝女之桑。鬱鬱丹城。並挂陶潛之柳。梅風拂戶。牖之內。麥氣擁宮闕之前。敬想足下。聲聞九臬。詩成七步。涌蚌胎於學海。卓爾超羣。蘊鵠抵於文山。儼然孤秀。但某窮塗異縣。岐路他鄉。非無阮籍之悲。誠有楊

朱之泣。每遇秋風振響。鶉鷺驚子夏之衣。夜月流輝。鵲繞將軍之樹。既乖連璧之契。終隔斷金之情。中心藏之。卑誠至矣。今因去雁。聊寄芻蕘。如遇回鱗。希垂玉翰。

呂中

月四

麥隴移秋。桑津漸暮。蓮花汎水。豔如越女之顫。蘋葉漂風。影亂秦臺之鏡。炎風以之扇戶。暑氣於是盈樓。凍雨洗梅樹之中。火雲燒桂林之上。敬想足下。追涼竹徑。托蔭松間。彈伯牙之素琴。酌嵇康之綠酒。縱橫流水。酩酊頽山。實君子之佳游。乃王孫之雅事。某沈疴漳浦。臥病泉山。頓懷劉幹之勞。鎮抱相如之酷。是知枯榮莫測。生死難量。驗風燭之不停。如水泡之易滅。聊伸弊札。以代勞人。佇覩芳詞。希垂愈病。

五月

三伏漸終。九夏將謝。螢飛腐草。光浮帳裏之書。蟬噪煩柯。影入機中之鬢。濯枝遷而潦溢。芳槿茂而發榮。山土焦而流金。海水沸而漂爍。敬想足下。藏形月府。遁跡冰牀。披莊子之七篇。逍遙物外。玩老氏之兩卷。恍惚懷中。但某白社狂人。青緇末

學不從州縣之職。聊立松篁之間。時假德以爲鄰。或借書而取友。三千年之獨鶴。暫逐雞羣。九萬里之孤鵬。權潛燕侶。旣非得意。正可忘言。諸不具伸。應俟不會。

鐵林

月六

素商驚辰。白藏屆節。金風曉振。偏傷征客之心。玉露夜凝。直泫仙人之掌。桂吐花於小山之上。梨翻葉於大谷之中。故知節物變衰。草木搖落。敬想足下。時稱獨步。世號無雙。萬頃澄波。黃叔度之器量。千尋聳幹。嵇中散之楷模。但某一介庸才。三隅頑學。懷經問道。不遇披雲。負笈尋師。罕逢見日。俛仰興歎。形影自憐。不知龍前。不知龍後。鸞鵬雖異。風月是同。幸矣擇交。希垂影拂。

夷則七月

一歎分飛。三秋限隔。遐思盛德。將何以伸。白雲斷而音信稀。春山暝而江湖遠。敬想足下。羽儀勝睞。領更嘉賓。傾玉醅於風前。弄瓊駒於月下。但某登山失路。涉海迷津。聞猿嘯而寸寸斷腸。聽雁聲而雙雙下淚。當以黃花笑冷。白羽悲秋。旣傳蘇子之書。更汎陶公之酌。聊因三鳥略敘二難。面會取書。不能盡述。或明鳳念不黜

魚緘

南呂八月

宿昔親朋平生益友不謂窮通有分雲雨將乖既深伐木之聲更問采葵之詠屬以重陽變紱節景窮秋霜抱樹而擁柯風拂林而下葉金堤翠柳帶星采而均調紫塞蒼鴻追風光而結陣敬想足下秀標東箭價重南金才過吞鳥之聲德邁懷蛟之智但某衡門賤士甕牖微生既無白馬之談且乏碧雞之辯歎分飛之有處嗟會面之無期聊伸布服之言用述併糧之志

無射九月

節屆玄靈鐘應陰律愁雲拂岫帶枯葉之飄空朔氣浮川映危樓而疊迴胡風起截耳之凍趙日興曝背之思敬想足下山岳鍾神星辰挺秀潛明晦跡隱於朝市之間縱法化人不混鄉閭之下某陋巷孤游穿牆自活終朝息爨若孔子之爲貧竟日停炊如范生之在職牛衣當被畏見王章犢鼻親操恐逢犬子雖此慙賤而不羞貧綺服有時此言何述

應鐘十月

日往月來灰移火變暫乖語默頓隔秦吳既傳蘇李之書更有范張之志冷風盛

而結鼻。寒氣切而凝唇。虹入漢而藏形。鶴臨橋而送語。彤雲垂四面之葉。玉雪開六出之花。敬想足下。世號冰壺。時稱武庫。命長袂而留客。施大被以招賢。酌醇酒而拒切骨之寒。溫獸炭而祛透心之冷。某攜戈日久。荷戟年深。揮白刃而萬定死。生引虹旗而千決成敗。退龍劍而卻步。月下開營。進鯨鼓而橫行。雲前起陣。徒勞斬斫。豈用功勳。諸不具陳。謹伸微意。黃鐘十一月

分手未遙。翹心且積。引領企踵。朝夕不忘。眷友思仁。行坐未捨。既屬嚴風極冷。苦霧添寒。冰堅漢地之池。雪積袁安之宅。敬想足下。棲神鶴駕。眷想龍門。披玩之間。願無捐德。某種瓜賤。士賣餅貧生。入爨竈以揚聲。不逢蔡子。駕鹽車而顯跡。罕遇孫陽。徒懷叩角之心。終想暴腮之患。既爲久要。聊吐短章。紙短墨窮。何能懇露。呂大月十二

北周庾信答趙王啟

仰承張幕全韓。連營上地。澗池置陣。解鄧禹之圍。函谷開關。削王元之印。鋒旗朝

上。刁。斗。夜。鳴。彌。雄。壯。士。之。心。足。起。橫。行。之。志。况。復。才。人。出。娉。還。得。賢。夫。塞。外。有。夫。
人。之。城。軍。中。有。女。子。之。氣。都。尉。青。旗。卽。時。春。色。將。軍。大。樹。已。復。花。開。雲。氣。浮。壘。流。
星。泛。枕。細。舞。長。歌。橫。簫。直。笛。當。乎。此。時。青。雲。之。上。信。不。學。無。術。本。分。泥。沈。忽。逢。天。
造。搜。揚。仄。陋。今。者。遂。總。憲。司。預。聞。刊。鼎。獻。歲。刑。書。既。應。懸。法。上。春。木。鐸。方。須。徇。人。
但。年。髮。已。秋。性。靈。久。竭。嘉。石。肺。石。無。以。測。量。舌。端。筆。端。惟。知。繁。擁。乖。展。一。月。遂。涉。
兩。年。傾。首。東。瞻。山。河。千。里。風。塵。未。盡。霜。露。霑。衣。仰。願。珍。宜。以。爲。身。寶。

唐王勃上從舅侍郎啟

某啟。一昨弟勛至。奉命以憲臺詩十首垂示。氣橫霜署。彩洞雲扃。繡衣兼藻。肆之
華。白。簡。控。玄。機。之。奧。仙。驄。在。馭。踐。文。路。而。驅。神。冠。獬。下。臨。望。詞。林。而。直。指。某。質。惟。
茅。艾。名。隔。摺。紳。虛。霑。自。出。之。榮。每。愧。諸。甥。之。列。恩。華。曲。被。誨。誘。傍。臨。識。謝。知。音。榮。
深。覩。奧。虞。韶。忽。奏。聽。律。呂。而。忘。疲。楚。匣。遙。開。仰。光。芒。而。不。暇。昔。孔。融。之。逢。元。禮。罕。
覩。高。文。王。粲。之。謁。伯。喈。終。慚。懿。戚。援。今。企。古。議。德。疇。恩。荷。慄。兼。儲。悲。欣。兩。集。但。才。

非酷似攀宅相而多慙慕切如存臨渭陽而增感不勝荷戴屏營之至

唐王勃上明員外啟

側聞金鳥聳轡俯圓燧而抽光瑤兔浮輪候方諸而吐液斯則洪纖異數冥符造化之津高下相懸精契陶鈞之表故知聲同義合存長幼於三州理隔氣殊置山川於一面神交可託風雲於杵臼之間道不虛行涇渭於簪裾之列其有跡申知己投爵里於思齊事迫當仁抱龍泉而願割雖荆山已峻多輕抵鵠之珍而渤海方春敢進歸鳧之景伏惟丈人珠躔降德銑社抽英河嶽縱其神器烟霞發其符采江東第一家傳正始之音日下無雙譽重名流之首三冬文史先兆跡於青衿百里絃歌卽馳芳於墨綬彭澤陶潛之菊勝氣仍存河陽潘岳之花芳風遂遠榮加徙秩上膺蘭府之游寵奪攀輪更掌蓬山之務麟圖緝謚定榮辱於三泉鵷閣裁書考薰齋於四部既鶴鳴雲路望偃朝端鴻漸星臺俯諧僉議廉平譽號李宣伯之當官雅操繩時山巨源之稱職加以文場武庫發揮廊廟之師瓊樹瑤林寥

廓風塵之表。一邱一壑。同阮籍於西山。一嘯一歌。列嵇康於北面。詞條鬱霧。遙騰
駕日之陰。辨鏘橫霜。直上衝星之氣。鳧鐘蓄韻。聞片言而指掌。鸞鏡懸心。見一善
而明目。情源九派。士流欣滿腹之期。德宇千門。詞人有庇身之望。方當坐談帝席。
雄視羣公。豈徒比跡天府。雌伏郎官而已哉。某崇徽啟緒。盛德傳家。承太子之仙
宗。析將軍之遠系。朱輪在漢。列高士於三台。青蓋浮江。扈平王於七姓。遺風舊烈。
尙存清白之基。祖德家聲。代有縱橫之目。及金陵東覆。玉馬西奔。髦頭傑起。文儒
繼出。鳳鳴朝日。森梢煙雨之標。龍躍雲津。盤礴江山之氣。雖雄名雅譽。隨朔野而
揚聲。而華冕雕軒。比南風而不競。陳太邱之積善。羔雁成羣。謝車騎之餘芳。蘭蓀
不替。趨庭洽訓。共歌朱萼之篇。避席承歡。猶守青箱之業。嘗謂酣神北阜。藉春渚
而忘歸。動影南樵。坐秋山而長往。不意蘭皋獨嘯。輕交委鶴之書。芝澗行謠。坐辱
飛龍之使。年殊賈誼。仰宣室而方同業。謝劉繇。俯長途而遂惡塞。上浮雲之跡。空
倦吳山。隋侯明月之珠。終悲暗室。豈不知拂衣長謝。林泉多倦俗之因。安枕有餘

廟堂非養高之所。松楸坐月。臨黛壑而遐征。桂席攀風。俯青巖而自足。而欲俛首。屈膝逡巡。多士之林。弔影慙魂。翫麟文昌之府。徒以牛蹄已倦。臨大壑而驤鱗。羊角可逢。想高衢而撫翼。叅名國士。方叨智伯之恩。揮迹奉常。冀雪公孫之恥。識正平於處士。雖在孔融。期仲容於望外。終資許允。猶恐先馳。折翮驚鷓路之風。再舉枯鱗。空擊龍門之水。丈人借以顏色。資以恩波。垂雅契於長年。敘情交於累代。情加倒屣。知步頃之生光。禮極升堂。覺聲名之有地。是用俯抽丹思。上瀆清顏。鏤殊獎於肝膽。銜德音於咳唾。懦夫增氣。先歌易水之風。壯士投心。思赴吳宮之火。恩崇命淺。瞻呂梁而可泛。山高海深。陟孟門而何險。

（二）陳述 錄劉孝儀以下凡四首

梁劉潛從弟喪上東宮啟

亡從弟遵。百行無點。千里立志。同氣三荆之友。假寢十起之慈。皆體之於自然。行之如俛拾。自礪宮陪宴。釣臺從幸。攀附鱗翼。二十餘載。茫昧與善。一旦長辭。劍匿

光。芒。璧。碎。符。采。躬。搖。神。筆。親。動。妙。思。雖。每。想。南。皮。書。憶。阮。瑀。行。經。北。館。歌。悼。子。侯。
不。足。輩。此。深。仁。齊。茲。舊。愛。

唐韓愈上留守鄭相公啟

愈。啟。愈。爲。相。公。官。屬。五。年。辱。知。辱。愛。伏。念。曾。無。絲。毫。事。爲。報。答。效。日。夜。思。慮。謀。畫。
以。爲。事。大。君。子。當。以。道。不。宜。苟。且。求。容。悅。故。於。事。未。嘗。敢。疑。惑。宜。行。則。行。宜。止。則。
止。受。容。受。察。不。復。進。謝。自。以。爲。如。此。真。得。事。大。君。子。之。道。今。雖。蒙。沙。汰。爲。縣。固。猶。
在。相。公。治。下。未。同。去。離。門。牆。爲。故。吏。形。跡。嫌疑。改。前。所。爲。以。自。疏。外。於。大。君。子。固。
當。不。待。煩。說。於。左。右。而。後。察。也。人。有。告。人。辱。罵。其。妹。與。妻。爲。其。長。者。得。不。追。而。問。
之。乎。追。而。不。至。爲。其。長。者。得。不。怒。而。杖。之。乎。坐。軍。營。操。兵。守。禦。爲。留。守。出。入。前。後。
驅。從。者。此。真。爲。軍。人。矣。坐。坊。市。賣。餅。又。稱。軍。人。則。誰。非。軍。人。也。愚。以。爲。此。必。姦。人。
以。錢。財。賂。將。吏。盜。相。公。文。牒。竊。注。名。姓。於。軍。籍。中。以。陵。駕。府。縣。此。固。相。公。所。欲。去。
奉。法。吏。所。當。嫉。雖。補。繫。杖。之。未。過。也。昨。聞。相。公。追。捕。所。告。受。辱。罵。者。愚。以。爲。大。君。

子之爲政。當有權變。始似小異。要歸於正耳。軍吏紛紛入見告屈。爲其長者。安得不小致爲之之意乎。未敢以此仰疑大君子。及見諸從事說。則與小人所望信者。少似乖戾。雖然。豈敢生疑於萬一。必諸從事與諸將吏。未能去朋黨心。蓋覆黷。不以真情狀。白露左右。小人受私恩。良久。安敢閉蓄以爲私恨。不一二陳道。伏惟相公憐察。幸甚。幸甚。愈無適時。才用漸不喜爲吏。得一事爲名。可自罷去。不啻如棄涕唾。無一分顧藉。心顧失大君子。纖芥意如邱山。重守官去官。惟今日指揮。愈惶懼再拜。

唐李商隱上河東公啟

商隱啟。兩日前於張評事處。伏覩手筆。兼評事傳指意於樂籍中。賜一人以備紉補。某悼傷已來。光陰未幾。梧桐半歿。才有述哀。靈光猶存。且兼多病。眷言息胤。不暇提攜。或小於叔夜之男。或幼於伯喈之女。檢庾信荀娘之啟。常有酸辛。詠陶潛通子之詩。每嗟漂泊。所賴因依德宇。馳驟府庭。方思效命旌旄。不敢載懷鄉土。錦

茵象榻。石館金臺。入則陪奉光塵。出則揣摩鉛鈍。兼之早歲。志在玄門。及到此都。更敦夙契。自安衰薄。微得端倪。至於南國。妖姬叢臺。妙妓雖有。涉於篇什。實不接於風流。況張懿仙。本自無雙。曾來獨立。既從上將。又託英僚。汲縣勒銘。方依崔瑗。漢庭曳履。猶憶鄭崇。寧復河裏飛星。雲間墜月。窺西家之宋玉。恨東舍之王昌。誠出恩私。非所宜稱。伏惟克從至願。賜寢前言。使國人盡保展禽。酒肆不疑阮籍。則恩優之理。必以加焉。干冒尊嚴。伏用惶灼。謹啟。

宋蘇軾謝中書舍人啟

起於貶所。未及朞年。擢置周行。遽參法從。省躬無有。被寵若驚。竊惟人材進退之間。實爲風俗隆替之漸。必欲致治。在於得賢。雖一薛居州。齊言不能移楚。而用范武子。晉盜可使奔秦。崔楊進而廉儉。或風琰綰用而淫侈。改度誠國是之先定。雖民散而可收。拔茅茹者。以彙而征。附馬棧者。必先其直。用舍既見。好惡自明。人知所趨。勢有必至。今朝廷方講當世之務。力追前代之隆。雖改定法令。足以便事。而

未足以安民。寬弛賦役。足以安民。而未足以成俗。是以登進者老。搜求雋良。將使士知向方。民亦有恥。如軾者。山林下士。軒冕棄材。少而學文。本聲律雕蟲之技。出而從仕。有狂狷嬰鱗之愚。溝中不顧於青黃。爨下無心於宮徵。誤蒙收拾。已出優恩。荐履禁嚴。殊非素望。此蓋伏遇某官德配前哲。望隆本朝。名重圭璋。上助廟堂之用。言爲著蔡。下同卿士之謀。餘論所加。虛名增重。知丹心之尙在。憐白首之無歸。特借寵光。以寬衰病。任隆才下。恩重報輕。直道而行。恐非所以安愚不肖之分。充位而已。又不足以解卿大夫之憂。蚤夜以思。進退惟谷。恐懼戰越。不知所裁。

(三) 干謁 錄劉夢得以下凡四首。

唐劉禹錫謝僕射李相公啟

某啟。州吏還。伏蒙擺落常態。手筆具書。言及貞元中登朝人。逮今無十輩。又發中書相公一函。具道閣下亟言曩遊。顏間頗有哀色。夫溝中之木。與犧象同體。追琢不至。則坐成枯薪。朱而藍之。猶足爲器。苟液櫛曲戾。不足枉斧斤。願爲庭燎。以照

嘉客謹啟

唐李商隱爲先輩獻集賢相公啟

某竊觀貞觀朝書。伏見文皇帝因夢吹塵。方求風后。于畋問卜。始載磻溪。事偉於王圖。道光於帝載。下惟敷衽。上則虛襟。纏綿圖緯之前。窈窕天人之際。崇基立極。四足雖斷於神鼇。開物成功。七竅仍沾於混沌。禹羞乘欂。舜恥彈琴。白鳥已見於將雛。朱草仍聞於滯穗。共工蚩尤之輩。與貳負同袍。豕韋晉耳之徒。與七騶共御。是以今上貽謀負辰。相公餘慶持衡。用十一德之資。贊七百年之祚。古猶今也。仁豈遠乎。伏惟相公日觀同光。天球並價。揚鋒露鍔。則武庫常開。散藻摛華。則文星鎮見。一言悟主。三接承恩。季孟伊緜。友朋蕭邴。漢皇發論。十萬常愧於淮陰。齊后推誠。一二皆歸於仲父。百度旣已貞矣。九流又復清焉。牆東竈北。隱淪者咸欲呈材。猿飲鳥言。僻陋者皆思入貢。莊生獻臂。楊子拔毛。三百篇之詩。更無諷刺。二百年之史。永絕譏嫌。斯乃百代可知。一言以蔽。豈立錐側管。可折齒尋環。巍乎煥乎。

盛矣美矣。若某者。剖心寡竅。對面多牆。小比焦螟。敢矜巢窟。微同觸氏。寧務戰爭。徒以簪紱。承家階庭。受訓堂中。得桂已有。前叨幕下。開蓮仍當。後忝所宜。結囊無咎。綵服爲榮。絕方朔之上書。罷禰衡之投刺。直以措心賢路。誓志昌時。旣慕義無窮。思有道則見。伏惟相公霧能蔚豹。燔可燒龍。爲百氏之指南。作九州之木鐸。任安彥國。已在於廡中。揚子馬卿。並歸於門下。而猶渴饑未副。影響無寧。請客者不解衿禡。當關者空有皮骨。此某所以淮山遠至。漢棧斯來。望姬旦之吐餐。冀張華之倒屣。以昇堂客衆。擁篲人多。苟無譏蔑之言。難佐仲宣之陋。今輒以嘗所著文若干首上獻。伏惟少迴巖電。微駐台星。固無望於討論。庶或觀於指趣。儻蕭稂可刈。菅蒯無遺。蒙文宣一字之褒。得玄晏三都之序。便若神巫去厲。司命添年。禱祝之誠。造次於是。門遙閭闔。路隔瀛洲。於人世存思。空移氣序。以塵中仰望。未見端倪。希陪上士之流。終預羣仙之末。祈恩望德。乃百斯生。干冒威嚴。下情無任惶懼感激之至。

唐李商隱獻舍人河東公啟

某啟。前月十日。輒以舊文一軸上獻。卽日補闕。令狐子直至。伏知猥賜披閱。今日重於令狐君處。伏奉二十三日榮示。特迂尊嚴。曲加褒飾。捧緘伸紙。終慙且驚。某本乏英華。且無聲采。雖成書有託。而爲裘未工。重以迫於世資。窘此家素。管寧木榻。坐已膝穿。孔伋緼袍。行而肘見。然猶開卷獨得。懸頭自強。韋編鐵搗。屢聞斷折。亡書墜冊。蠹識篇題。而投足多難。寫誠無所。舉非高第。仕怯上農。虞寄爲官。何嘗滿秩。王華處世。寧願異人。況在下寮。獨無誰語。一至於此。欲罷不能。每念大漢之興。好文爲最。悅洞簫之製。則諷在後庭。美子虛之文。則恨不同世。然猶揚雄以草玄見誚。馬卿亦用貲爲郎。何賓實之紛綸。而名義之乖爽。況乎志異數子。事非當時。司寇棲棲。反歎爲佞。嗇夫喋喋。誰爲非賢。又安可坐榮於寒谷之中。自致於剛氣之上。矧灰籥難駐。圭管無停。若使蜀臣之九考不移。漢郎之三朝莫過。人嘲染鬢。帶憤減圍。卽葛洪命述。永處跛驢之伍。田光精竭。必爲駑馬所先。伊秀銳之既。

衰亦銑穎之都。盡方今外無戰伐。內富英賢。閣下文爲世師。行爲人範。廓至公之路。優接下之誠。是願竊望門闈。仰干闈侍。果蒙旌異。特損緘題。夫收掌上之妍者。在假之長袖。騁櫪中之駿者。必資於坦塗。然後可求其宛轉之能。責其滅沒之功。是當延望。實在深誠。倘蒙一使御車。與之下座。雖不足丹青時輩。領袖諸生。冀獲預於游談。庶少賢於博奕。伏惟念錄。謹啟。

王先謙上胡筱泉師啟

山川阻修。日月悠忽。企瞻顏範。誠結肺腑。炎荒之維。麟洲之下。景純望氣。云是衣冠。曲江肇文。鏘乎韶石。得我夫子。益之化成。所謂采蘭入谷。不雜凡卉。貢金於廷。必發異光者矣。暇時文讌。羣彥攀追。花田送馨。酌以芳醴。越秀攬古。登其遺臺。風流蔚然。賢衆翕若。耳茲盛事。實用醉心。某春莫向畢。言旋帝畿。再試承明。幸無隕越。猥自夏假。迄於秋孟。停車訪師。煮酒招客。東觀圖籍。爛其盈几。西山爽氣。時來撲人。然而鄉井云遙。菽水無賴。每一寘念。怛怛五中。便思戒途。勞勞半載。俛臨山

川○瞻○此○文○藻○仰○愧○鴻○鴈○謀○及○稻○梁○庶○幾○岷○峩○或○者○嶺○嶠○願○以○冬○日○坐○於○春○風○珊○瑚○石○閒○授○我○層○網○翡○翠○海○上○掇○公○棄○羽○豫○達○寸○意○伏○候○鑒○裁○商○飆○戒○寒○福○履○自○衛○

(四) 達謝

錄劉孝儀以下凡十三首

梁劉潛謝晉安王賜宜城酒啟

歲○暮○不○聊○在○陰○卽○慘○惟○斯○二○理○總○萃○一○時○少○府○鬪○猴○莫○能○致○笑○大○夫○落○雉○不○足○解○顏○忽○值○餅○瀉○椒○芳○壺○開○玉○液○漢○罇○莫○過○殷○杯○未○逢○方○平○醉○而○遁○仙○羲○和○耽○而○廢○職○仰○憑○殊○途○便○申○私○飲○未○矚○疊○恥○已○觀○幘○岸○傾○耳○求○音○不○聞○霆○擊○澄○神○密○眊○豈○覲○山○高○愈○疾○銷○憂○于○斯○已○驗○遺○榮○忽○賤○卽○事○不○欺○酪○酊○之○中○猶○知○銘○刻○

梁張纘謝東宮賚園啟

性○愛○山○泉○頗○樂○閒○曠○雖○復○伏○膺○堯○門○情○存○魏○闕○至○於○一○邱○一○壑○自○謂○出○處○無○辨○常○願○卜○居○幽○僻○屏○避○喧○塵○傍○山○臨○流○面○郊○負○郭○依○林○結○宇○憩○桃○李○之○夏○陰○對○徑○開○軒○採○橘○柚○之○秋○實○而○王○畿○陸○海○畝○號○一○金○涇○渭○土○膏○豪○傑○所○競○徙○居○好○時○必○待○使○越○

之裝別館。河陽亦資牧荆之富。此園左帶平湖。修陂千頃。右臨長薄。清潭百仞。前逼逸陌。朝夕爽塏。之容後望。鍾阜表裏烟霞之氣。每瞻春迎夏華。卉競發。背秋向冬。雲物澄霽。窺瞰戶牖。不異登臨。升降塔墀。已窮歷覽。舟楫所屆。累日不能究其源。魚鳥之豐。山澤不能喻其美。

梁庾肩吾謝東宮賜宅啟

肩吾居異道南。才非巷北。流寓建春之外。寄息靈臺之下。豈望地無湫隘。里號乘軒。巷轉旛旗。門容幘蓋。況乃交垂五柳。若元亮之居。夾植雙槐。似安仁之縣。却瞻鍾阜。前枕洛橋。池通西舍之流。窗映東鄰之棗。來歸高里。翻成待封之門。夜坐書臺。非復通燈之壁。才下應王禮加温阮。官成名立。無事非恩。

梁庾肩吾謝曆日啟

凌渠所奏。弦望旣符。鄧平之言。錯銖皆合。登臺視朔。覩雲物之必書。拂管移灰。識權衡之有度。初開卷始。暫謂春留。未覽篇終。便傷冬及。徘徊厚渥。比日爲年。

北周庾信謝趙王賚絲布等啟

望外之恩。實符大賚。非常之錫。乃溢生涯。曳練且觀。無勞白馬之望。流泉欲委。佇見青鳧之飛。楊池掘荷。李園移樹。陳留下粟。有媿深恩。櫟陽雨金。翻慚曲施。靈臺久客。從此數炊。黍谷長寒。於今更暖。從雲夢之田。不喻此樂。得豐城之劍。未均斯喜。

北周庾信謝趙王賚絲布啟

某啟。奉教垂賚。雜色絲布三十段。去冬凝閉。今春嚴勁。霰似瓊田。凌如鹽浦。張超之壁。未足鄣風。袁安之門。無人開雪。覆鳥毛而不暖。燃獸炭而逾寒。遠降聖慈。曲垂矜賑。諭其蠶月。殆罄桑車。津實秉杼。幾空織室。遂令新市數錢。忽疑販綵。平陵月夜。驚聞擣衣。妾遇新縑。自然心伏。妻聞裂帛。方當含笑。莊周車轍。實有涸魚。信陵鞭前。元非窮鳥。仰蒙經濟。伏荷慈深。

北周庾信謝趙王賚米啟

某啟。奉教垂賚米十石。丹鳥銜穊。既集西周。黃雀隨車。還飛東市。漬而爲種。不無霜雪之精。取以論兵。卽有山川之勢。某陋巷篳瓢。櫛風沐雨。剝榆皮於秋塞。掘蟄蕪於寒山。仰費國租。遂開塵甑。非丹竈而流珠。異荆臺而炊玉。東方朔之捧米。既息長饑。西門豹之墾田。方慙此賚。

北周庾信謝趙王賚白羅袍袴啟

程據上表。空論雉頭。王恭入雪。虛稱鶴氅。未有懸機巧綜。變躡奇文。鳳不去而恆飛。花雖寒而不落。披千金之暫暖。棄百結之長寒。永無黃葛之嗟。方見青綾之重。對天山之積雪。尙得開襟。冒廣樂之長風。猶當揮汗。白龜報主。終自無期。黃雀謝恩。竟知何日。

北周庾信謝趙王示新詩啟

八體六文。足驚毫翰。四始六義。實動性靈。落落詞高。飄飄意遠。文異水而湧泉。筆非秋而垂露。藏之山嶺。可使雲霧鬱起。濟之江浦。必當蛟龍繞船。首夏清和。聖躬

怡裕琉璃彤管。鵲顧鸞迴。婉轉綠沈。猿驚鴈落。下風傾首。以日爲年。撻爲舍人。實有誠願。碧鷄主簿。無由遂心。寂寞荆扉。踈蕪蘭徑。驂駕來梁。未期卜日。遣騎到鄴。希垂枉道。

北周庾信謝滕王集序啟

紫薇懸映。如傳闕里之書。青鳥遙飛。似送層城之璧。若夫甘泉宮裏。玉樹一叢。玄武闕前。明珠六寸。不得譬此光芒。方斯照燭。有節有度。卽是能平。八風愈唱。愈高。殆欲去天三尺。殿下雄才。蓋代逸氣。橫雲濟北。顏淵關西。孔子譬其毫翰。則風雨爭飛。論其文采。則魚龍百變。蒲桃繞館。新開碣石之宮。修竹夾池。始作睢陽之苑。琉璃泛酒。鸚鵡承杯。鳳穴歌聲。鸞林舞曲。况復行雲逐雨。迴雪隨風。湖陽之尉。旣成爲喜之因。春陵之侯。便是銷憂之地。某本乏材用。無多述作。加以建鄴陽九。劣免儒礪。江陵百六。幾從士壠。至如殘編落簡。並入塵埃。赤軸青箱。多從灰燼。比年疴恙。彌留光陰。視息桑榆。已逼蒲柳。方衰不無秋氣之悲。實有窮途之恨。是以精

采。瞽。亂。頗。同。宋。玉。言。辭。蹇。吃。更。甚。揚。雄。一。吟。一。詠。其。可。知。矣。好。事。者。不。求。知。音。者。不。用。非。有。班。超。之。志。遂。已。棄。筆。未。見。陸。機。之。文。久。同。燒。硯。至。於。凋。零。之。後。殘。缺。所。餘。又。以。雜。用。補。袍。隨。時。覆。醬。聖。慈。憐。愍。遂。垂。存。錄。始。知。揄。揚。過。差。君。子。失。辭。比。擬。縱。橫。小。人。迷。惑。荆。玉。抵。鵲。正。恐。輕。用。重。寶。龍。淵。削。玉。豈。不。徒。勞。神。慮。匠。石。迴。顧。朽。材。變。於。彫。梁。孫。陽。一。言。奔。蹄。成。於。駿。馬。故。知。假。人。延。譽。重。於。連。城。借。人。羽。毛。榮。於。尺。玉。溟。池。九。萬。里。無。踰。此。澤。之。深。華。山。五。千。仞。終。愧。斯。恩。之。重。卽。日。金。門。細。管。未。動。春。灰。石。壁。輕。雷。尙。藏。冬。蟄。伏。願。聖。躬。與。時。納。豫。南。陽。寶。雉。幸。足。觀。瞻。酈。縣。菊。泉。差。能。延。壽。伏。遲。至。鄴。可。期。從。梁。有。日。同。杞。子。之。盟。會。必。欲。瞻。仰。風。塵。共。薛。侯。而。來。朝。謹。當。逢。迎。冠。蓋。魚。腸。尺。素。鳳。足。數。行。書。此。謝。辭。終。知。不。盡。

唐李商隱謝河東公和詩啟

某前因暇日出次西溪。旣惜斜陽。聊裁短什。蓋以徘徊勝境。顧慕佳辰。爲芳草以怨王孫。借美人以喻君子。思將玳瑁。爲逸少裝書。願把珊瑚。與徐陵架筆。斐然而

作。曾。無。足。觀。不。知。誰。何。仰。達。尊。覽。果。煩。屬。和。彌。復。驚。惶。某。曾。讀。隋。書。見。楊。越。公。地。處。親。賢。才。兼。文。武。每。舒。錦。繡。必。播。管。絃。當。時。與。之。握。手。言。情。披。襟。得。侶。者。惟。薛。道。衡。一。人。而。已。及。觀。其。唱。和。乃。數。百。篇。力。鈞。聲。同。德。鄰。義。比。彼。若。陳。葛。天。氏。之。舞。此。必。引。穆。天。子。之。歌。彼。若。言。太。華。三。峰。此。必。曰。潯。陽。九。派。神。功。古。跡。皆。應。物。無。疲。地。理。人。名。亦。爭。承。不。缺。後。來。酬。唱。罕。繼。聲。塵。嘗。以。斯。風。望。於。哲。匠。豈。知。今。日。屬。在。所。天。坐。席。行。衣。分。爲。七。覆。煙。花。魚。鳥。置。作。五。衡。詎。能。狎。晉。之。盟。實。見。取。鄼。之。易。不。以。釁。鼓。惠。莫。大。焉。恐。懼。欣。榮。投。錯。無。地。

清李慈銘謝潘伯寅侍郎饋銀啟

使。來。渥。拜。朱。提。之。賜。誼。溢。倫。表。望。踰。分。外。僵。臥。蹙。起。痼。疾。頓。蘇。炊。煙。驟。生。鄰。家。疑。爲。增。竈。酒。券。畢。了。市。保。訝。其。點。金。執。事。清。絕。朝。流。秩。懸。班。品。卿。奉。未。給。內。直。須。供。婁。聞。質。貂。之。言。頗。書。乞。脯。之。帖。迺。復。垂。念。相。如。之。渴。竟。傾。隱。之。之。泉。事。出。過。情。益。用。鏤。肥。慈。銘。質。等。蒲。柳。材。謝。籛。條。莫。效。技。於。下。風。徒。仰。飲。於。清。露。閉。門。有。恃。補。屋。

何愁。舜。疊。慚。顏。汗。浹。悚。夢。謹。修。狀。陳。謝。不。宣。

清李慈銘謝樊雲門庶常惠先君子生日祭銀啟

大火流西。清風戒節。後嘗祭之六日。值先人之誕辰。歲在疆梧。算盈七豔。萊衣換葛。久絕稱觴之期。禮堂授經。已迷鑿楹之處。治魚菽以充薦。貌音容其莫追。難援稅服之文。虛設事存之禮。夫周禮猶醪。非所語於朋施饋食。將賓詎反資其家具。吾弟孝能錫類。廉欲潤人。猥分陔蘭之餐。以左楚茨之祭。晏嬰節儉來豐。弋卵之筵。顧歡永懷。免廢蓼莪之什。深銘寒露。載戢高風。

(五)致賀 錄柳子厚以下凡四首

唐柳宗元賀趙江陵宗儒辟符載啟

某啟。伏聞以武都符載爲記室。天下立志之士。雜然相顧。繼以歎息。知爲善者。得其歸嚮。流言者有所間。執直道之所行。義風之所揚。堂堂焉實在荆山之南矣。幸甚幸甚。夫以符君之藝術志氣。爲時聞人。才位未會。盤桓固久。中間因緣。陷在危

邦與時偃仰。不廢其道。而爲見忌嫉者。橫致辱吻。房給事以高節特立。明之於朝。王吏部以清議自任。辨之於外。然猶小人浮議。困在交戟。凡諸侯之欲得符君者。城聯壤接。而惑於騰沸。環視相讓。莫敢先舉。及受署之日。則皆開口垂臂。悵望悼悔。譬之求珠於海。而徑寸先得。則衆皆快然。罷去。知奇寶之有所歸也。嗚呼。巧言難明。下流多訕。自非大君子出世之氣。則何望焉。瞻望清風。若在天外。無任感激。欣躍之至。輕瀆陳賀。不勝戰越。不宣。

宋秦觀賀呂相公啟

伏審光膺宸命。顯正台司。凡在生成。舉同忭蹈。竊以媯皇補天之際。高宗夢帝之初。未就泥金。正資陶鑄。不調琴瑟。方賴更張。是謂大有爲之時。必得非常人之佐。恭惟中書僕射相公。累朝元老。名世大儒。力足以扶持顛危。風足以興起貪懦。青天白日。奴隸亦知其明。璞玉渾金。鑒識莫名其器。旣天資之篤實。加地胄以高華。四世五公。勳在王室。一門萬石。寵冠廷臣。宗族謂之小許公。夷狄以爲真漢相。果

從人望。爰享天心。方思左轄之嚴。遽踐鸞臺之峻。獻可替否。而思矯激之過。解紛挫銳。而有調和之能。必欲成仁之始。終非特潔身之去就。繇是端人。羣集異黨。寢微寬大之澤。四覃苛刻之風。一變名既得功。而並立位當與德。而俱崇。明詔始班。吉士交慶。太公入國。固知天下之父。歸伊尹得君。益見聖人之任重。某猥緣幸會。叨被題評。昔陪北海之樽。有同夢寐。今望平津之館。如隔雲天。但欣衆正之路。開始信太平之塞。責願稽故事。就封富民之侯。請與諸生。復上得賢之頌。

宋汪藻賀李丞相啟

躬被策書。進居丞弼。精忠貫日。正二儀傾側之中。凜氣橫秋。揮萬騎笑譚之頃。國須賢立。天爲時生。恭惟某官。厚德鎮浮。英林經遠。得文武弛張之樞要。獨運胸中。明古今治亂之淵源。不專紙上。爰自踐敷之始。每勤獻納之忠。老成尙有於典刑。天下想聞其風采。昨屬殊鄰之擾。上貽當宁之憂。夕烽旣徹於甘泉。清蹕將游於汾水。唯公夙夜。與國存亡。挺身六品之卑。抗議九重之邃。畱家誓死。鏡血書詞。銷

大變於胚胎。轉危機於呼吸。泊干戈之息戰。援桴鼓以登陴。義動三軍。人皆奮死。氣吞異類。虜輒請盟。身雖九隕。而一生國則崇朝。而再造。既名高而衆媚。乃讒就而身危。士訟公冤。亟舉幡而集闕。下帝從民望。令免胄以見國人。薦經難危。益見奇偉。方主上清明於今日。實邦家希闕之昌期。欲衆賢同建於事功。非雅望孰爲於師表。將萬世維持之是賴。何一時康濟之足言。某久託在間。欣聞盛事。雖無緣旅進。旅退。陪賓客之後塵。豈不能大書特書。續山林之野史。

清袁枚爲黃太保賀經略傅公平大金川啟

蓋聞射鵬無力。難彎青海之弓。洗甲有心。誰挽銀河之手。福不宏者。不足以成大事。量不遠者。不可以語武功。故韋臬度鐵嶺。而南番降。馬隆到涼州。而樹機破。叔敖甘寢秉羽。而郢人息兵。唐叔搏兕徒林。而太甲靖亂。大抵功因將立。臣爲主生。飛龍服皂於黃靈。赤文候日於堯屋。恭惟經略忠勇公閣下。識窮兩戒。學通四夷。蕭何昂宿之精。傳說中闈之祠。皇上以金川不順。前帥無功。命亞夫代灞上之軍。

假王導以安東之節。當是時。天子有憂邊之色。三軍無報捷之書。公以鄧禹之英年。抱終軍之逸氣。加柱天都部。領百保鮮卑。屢及空皇。謂誓師之始。梟鳴牙。土卜取賊之功。爾乃躡鳥角。過青岡。渡桃關。走天射。馬難容足。車不雙行。殷武伐荆蠻。誰能采入。岳侯討楊太。除是飛來。公造張綱之衝車。破公孫之鐵檻。製宣王之輓屐。曳朱泚之雲橋。誘彼馬人。搜其龍戶。一鼓作氣。三刻踰溝。其摧堅也。如篲汜畫塗。其奪寨也。如決流抑隊。我御未爲鵝鸛。彼軍將化蟲沙。人方疑荀營之取。偪陽何其難。而魏舒之降鼓。子何其易也。不知黑龍噓氣。代公之草檄方成。飛鳶墮溪。伏波之毒淫難受。飲摩訶之地汁。拜井無靈。啖穎上之弓絃。量沙自壯。而且九折叱王尊之馭。三更裏鄧艾之綿。奉走卒以爲師。謙能下士。射酒樽而不動。忠且忘身。肉非黃羊。不畏汝刺。金雖如粟。豈入我懷。非有動心忍性之功。其能有熙天耀日之烈乎。正月初六日。金川酋詣大軍乞降。公稱詔書許其不死。於是雪霽降旗之上。花迎銜璧之人。葉鑄多羅。手牽玉象。捧盤上表。織錦陳詩。公卽洞開重門。雍

容免胄釋蔡州之牙。卒用孟獲之軍。人頃田不租。十妻不算。此秦王之誓言也。我無爾詐。爾無我虞。此宋公之盟約也。界銅柱以千年。定天山於三箭。玄旗返旆。白馬還朝。荀羨二十之年。威儀可想。蔡茂三公之服。士女爭看。解去兜鍪。重含雞舌。八戰八克。爲隴右所希。聞七縱七擒。實南夷所心服。昔劉方之征林邑。殺象享軍。萬歲之渡蜻蛉。仆碑應讖。以彼奇功。方斯蔑矣。天子禮頒異數。恩錫非常。覆韋綬以蜀纈之袍。賜房喬以黃銀之帶。金釵阿杜。詔餉盤龍。寶劍椎成。署頒陳寵。水晶鹽好。分崔浩以同甘。鐘鼓聲希。探李晟之安否。某一官柴立。萬里鳧趨。寫孫歆慶捷之書。慚無健筆。讀魏絳和戎之奏。如接英風。祝天上之貪狼。年年斂角。願將軍之大樹。歲歲開花。

(六) 公啟 錄劉圃三以下凡六首

清劉星煒爲勝國閻陳二公徵詩啟

我國家箕緯膺圖。元都御錄。天戈所指。反舌無聲。海水來宗。夜郎不大。爰是軫秦。

庭之哭。電掃黃巾。彰殷武之威。風馳紫塞。漸臺放仗。揭竿行。王莽之頭。鉅野殪。凶
分冢。磔蚩尤之體。三靈祇若。六宇謳歌。嬰子奉以龍圖。高寢遷其龜鼎。斯時也。八
州牙纛。上璽綬以請纓。五等貂璫。望軍門而解辮。蓋以韓仇已報。畱侯義得。受封
商命不常。祿父勢難梗化。鸚飛鰈走。盡戴皇輿。厥苦薇甘。寧非周粟。然而義君布
日冰崖。畱獨冷之蠶。異母迴颺。珠岸茁反風之草。其有七旬逆命。二尉嬰城。雖吠
味尊堯。亦哀同望帝。詳其軼事。良足慨心。日者明祚既終。燕雲告難。翟泉蒼鳥。盡
蹴飛沙。鄴苑銅駝。俱淪廢棘。北斗珠旗。箕日甲子。徇師南朝。鐵鎖沈江。庚申出迪。
惟茲水國。古稱鼃黽爲鄰。況值隆車。雖有螳螂不怒。維時陳公倉皇銜恤。慷慨登
陣。封江上以丸泥。驅市人而制梃。九衢僞楚。皆爲李勉之兵。百雉崇墉。卽是王巖
之塚。我朝於是命戈船而下瀨。揮彈羽以張羅。飲馬於河。雪滿騶駘之廐。連鷄爲
柵。天長驃騎之營。藐爾孤城。方猶黑子。先此孫恩。內犯十年。未復瘡痍。今茲祖約
乞降。七校爭爲鄉導。爰以閻公夙膺干楨。劈海而掃鯨鯢。素習戎韜。臨城而嚴蛇

馬公果懸車無懼。成竹在胸。鍛矢。韋車。長社之百樓。未動。復隍。塹。塹。晉陽之三版。愈艱。燒殘。卽墨之牛。神燈自炳。刈盡。瑯琊之稻。鬼妾可餐。饗士。中秋。壓笛。而悲歌。饒吹。行師。六月。帕首。而更插。鞞刀。所以。南頓。舊臣。先傷。賈復。臨濠。名將。幾。霞。花。雲。羣公。誓斬。嚴顏。天子。思招。余闕。鴻置。疎網。命輸。攻揭。以虞。旛。窮島。飛書。詔橫。來。蠲。其。釁。社。嗟。乎。愍。懷。盡。室。血。面。朝。天。高。武。孤。孫。青。城。搏。穎。正。使。杜。鵑。啼。盡。雞。甦。游。岱。之。魂。精。衛。銜。殘。奚。補。窮。桑。之。壑。矧。復。陸。機。入。洛。河。橋。登。上。將。之。壇。庾。信。適。周。開。府。進。儀。同。之。號。二。公。使。勉。遵。朝。旨。早。豎。降。旗。出。臯。羽。於。西。臺。坐。左。車。而。東。鄉。文。淵。擇。主。終。高。銅。馬。之。勛。雍。齒。封。侯。勿。替。礪。山。之。誓。其。視。呈。身。短。簿。投。老。蠻。參。汝。鼓。汝。弓。已。盡。國。人。之。報。江。花。江。草。何。關。野。老。之。悲。而。乃。斷。指。無。歸。裹。瘡。復。戰。此。則。缺。斨。破。斧。公。且。所。以。悲。來。觸。石。移。山。愚。公。因。之。坐。隕。者。也。果。爾。江。空。木。梯。莫。禦。龍。超。風。墮。紙。鳶。難。爲。墨。守。靈。鼉。不。舉。鼓。已。絕。於。死。聲。妖。鳥。爭。飛。人。復。遊。其。生。魄。黃。旗。紫。氣。爭。聞。班。馬。之。聲。哀。雁。嗥。猿。齊。和。守。陴。之。哭。二。公。雷。霆。屹。若。鋒。刃。恬。然。旋。出。火。以。自。燔。

共膏原而奚惜。焚巢殺卵折戟沈槍。邱山同穴。誰歸先軫之元。燐火紛流。孰辨冀弘之血。綽最已憐。其併命。眈眈復痛於懷沙。今者帝網恢張。天閭映蕩。屬勝朝之苞孽。盡貫金鷄。凡華表之游魂。俱招唳鶴。穀城片壤。與魯國以後降。沫土故封。憫殷頑之待盡。從此奎章正史。遂傳韓通丹鼎。爰書不名程濟。然而實沈無祀。峴首沈碑。追恫鬼雄。益彰官謗。某緬懷前喆。載訊邦人。知廣陵彈盡之時。近祇樹香聞之地。修羅戈戟。罹劫燒之三災。江表芙蓉。建高臺之一柱。文鏡武鼓。摧殘薤露之歌。桂棟杏梁。黯慘平陵之色。所冀咏懷古蹟。少陵述以寄言。勸獎忠臣。坡老貽之碑版。

清洪亮吉孫太孺人八十節壽徵詩啟

夫萬物競流。不移金石之性。百卉謝氣。始聞椒蘭之馨。貞於運者久。則享其報者烈焉。是以物性至雜。而冬生之木必貞。有生不恆。而夜半之禽獨壽。理可言焉。見於是矣。孫母許太孺人。陽羨之名宗也。父知縣君。南閣祭酒。旌陽仙令。鵝籠一具。

飄爾攜家。鮫浦十年。傷哉遠宦。孺人終鮮兄弟。獨奉庭闈。陰雪豔其高才。飲冰同其清德。年二十。贅贈君於家。而延陵善愁。扶風易病。集樓之鳳。已罷吹簫。過隙之駒。猶勤學易。逾年舉一子。而贈君遽卒。知縣君既因玉樹之摧。欲奪柏舟之志。孺人叩心出誓。瀝血自明。所生憮然不能強也。無何知縣君亦卒。嗟乎父兮母兮。逝者已矣。天只人只。生者奚辜。勞耳叫天。則清霜凌於平旦。截髮搶地。則白日冥於中庭。遂乃兩櫓克前。雙旌並舉。昔叔先雄之殉孝。白貞姬之矢節。具一於此。已訖。至崎兼而有之。斯爲大感。於是帷車萬里。則馬助哀鳴。過峽百重。則猿隨墮淚。崩城之慟。行路咸傷。者與窀穸既成。蒿麻不釋。英臺讀書之地。隻影無依。臨沂感孝之瀆。半塵爰闢。先是知縣君有家財。臨沒析其半以畀孺人。孺人雖身挾積貲。室無長物。古屋則神鐙時出。壞牆則燐火羣飛。懷璧是憂。瘞金無所。至乃緘以素纈。藏之斗拱。湔上寡婦之僕。涕一尺而偷窺。南陽不義之奴。縫兩囊而默運。孺人不。及知也。無何乳媪之居。喧傳金穴。里卒之舍。赫建重樓。僚僕以告。孺人乃疑。發棟。

視之空篋在焉。孺人既寃結莫伸。詣神自訴。爾乃傭奴鬼縛。里嫗神驅。叩首投情。詣官自告。鼠穴搜其剩貲。牛車載其餘貨。十僅獲一。稍以自存。人以爲至誠之感焉。一日以貧困坐古室中。長歎甫伸。一嫗歛至。謂孺人曰。爾無憂矣。顧視之閒。形神頓失。翌日趨影堂視之。則某代某妣之象似焉。宜都之覲聖善。無假冥求。潁川之覲先靈。非煩左顧。貞孝之獲佑。一至此乎。於是若有若焯掌。報母氏之劬。顏生餐煤。共歎年之食。歲丙子。令子舉順天鄉試第十三人。祀騰甫歸。計偕適值。時孺人方當扶杖。已荷旌閭。三江浩然峙。襄清之百尺。萬瓦香若表。行義之一椽。更復桓氏之嫠。推本帝師之規。夏侯之孫。呼從外家之姓。義興房之號。與定遠支相配云。

孫故定遠分支及孺人以節顯里中又呼爲宜興三房舉母氏也

參越十年。孝廉筮仕。得句容儒學教諭。百里就官。

六旬迎養。孺人有田一頃。遂命入於大宗。以奉時祭。樹墓櫬焉。夫長樂讓產。獨表於儒林。平輿贍宗。不聞於閨閣。而孺人顧以仁讓之德。克紹孝弟之宗。有識偉之宗。鄙欽之者矣。御板輿而入官。隔紗帷而助課。過庭學禮。則移訓文孫。遷舍斷機。

則親督婢媪。雍雍焉。肅肅焉。蓋敬姜之告文伯。大家之誨子成。無以易此。未幾而平原文學。遠著賢聲。洛陽秀才。亦垂妙譽。句容固當孔道。時集勝流。於是過令伯之居。先瞻大母。詣士行之室。必拜尊親。而孺人亦視聽不衰。禮儀可範。餌華岡之朮。肌體愈輕。讀老氏之書。神明頓徹。歲丙午。疊荷覃恩。介茲眉壽。遂卽官舍。爲孺人稱八十之觴。禮也。大年之兆。非假乎學仙。餘慶之徵。必推於積善。亮吉等與孺人子若孫交。欽禮宗之在望。過義門而先式。咸以爲琬琰可以鐫德。竹帛可以著聲。不有鉅篇。曷彰朗節。於是采其本末。跡其操行。以貽世之君子云。

清吳錫麒徵張琴溪六十壽言啟

夫麥邱之祝。邀禮於齊廷。公堂之躋。播聲於豳雅。乃至比齡旗翼。等算嵩衡。固知介壽以言。其來古已。然而大年可致。非假乎遊仙。餘慶有徵。要推之積善。欲藉稱觴之助。當求撫實之詞。亮金心之勿渝。幸玉體之自愛。以期難老。如說平生。故可樂也。維我琴溪先生。羈貫夙成。神明特異。具絕人之識。星本連天。擅博物之名。圖

能畫地其燭事也。爛爛若王戎之電。其植身也。森森如和嶠之松。懷光暢幽。修德獲報。於今年八月爲先生六十壽辰。玉捧蟾盤。金霏麝粟。天上之霓裳。未舞人間之綵筆。先催敢效。引喞用資。潤色蓋先生生於邗上。家本秦川。三世寓公。一門清望。令叔秋子松坪兩前輩。聯裾蕊榜。接翅木天。棠棣之碑。可刊於蓬觀。驄馬之諺。復起於蘭臺。並能無慕崇階。早遂初服。尊甫一齋先生。推姜肱之布被。啟樊重之廣居。不出戶庭。友于兄弟。聽東齋之雨。有約連牀。遇西陵之風。無勞佇楫。故先生得以陳觴月候。奉饌花餘。敬修婉婉之容。親習怡怡之樂。此承家之可述也。內行無間於人言。陰德自鳴於己耳。季野四時之氣。獨受春多。叔度千傾之波。交推量勝。每以如苴警慮。眠挺箴心。惠及宗支。逮於親串。九族仰同功之火。四方賴續命之田。所以匡困資無。救羸匱死者。其心無弗摯也。其願無弗償也。畫虎尾春冰之館。閱歷滋深。望廉泉讓水之鄉。徘徊未已。此制行之可述也。枕葍之富。旣積之等身。研索之精。更劬於焯掌。故其補博士弟子也。凡歷三試。輒冠一軍。黃童爲江夏。

無雙紀瞻乃秀才第一。方將蒞強臺之牛耳。馳弱水之羽軍。而乾蔭遽傾。家督靡委。移心積著之計。有事羽鳩之司。然且擁黃卷若百城。視青氈爲故物。聚寧插架。好甚臨池。涓辰練日以陳經。引水抽絲而結字。過丹鉛於手裏。善比春明。戀滋味於兒時。勤逾冬學。此篤志之可述也。紅橋佳勝。名園纏連。每遇時巡。恆駐清蹕。先生謂獻曝本野人之禮。傾陽亦小草之心。是用五畝旁規。一區廣闢。功成不日。景取長春烟。非烟而瑞靄。流雨其雨而飛泉。激得以寵邀宸盼。光借天題。至今露染槐眉。霞凝松棟。清輝被於林淑。異藻溢於巖阿。復因萬壽祝釐。重恩優錫。絲綸之賁。疊荷乎龍光。鞶帶之榮。有加於鵷序。此恩遇之可述也。古有望塵請友。置驛通賓。著投轄之錄。修見客之譜者。大抵侈言縞紵之盛。無益文字之資。先生則遠僧眞而移牀。避元規而障扇。自以早摟世務。有間方聞。凡遇澄覽博映之儒。浴素陶玄之侶。鑽光燈而散裘。緩春帶以命觴。莫不契結苔岑。愛均松柏。良友相對。今日何減子期。美人不來。明月輒思。元度此善交之可述也。夫人李氏珩璜薦饗。苕藻

流徽高致。穆其清風。勞心警其昧旦。河魴河鯉。知大國之女宗。佩韋佩紘。受高堂之母誡。令嗣君銘膺戊午鄉薦。今官刑部主政。諸子各標秀異。並極崢嶸。犀角麟璠於眼中。鳳毛斐尾於池上。宋延清能得一絕。遂妙文詞。邱希範纔及八齡。已同氣骨。金桃作對。玉樹蜚聲。槐蔭方濃。桐孫又長。此積慶之可述也。僕欽遲已久。契闊茲多。幸賢子之過從。每令音之來告。數騷人初度之歲。最喜逢庚。詠君子偕老之章。恰符周甲。而況家有傳學。代不曠僚。福祿集於一身。期頤卜之後日。自宜廣其稱述。播爲聲歌。附西流之魚。錦緘可達。奏南飛之鶴。銅笛須吹。詩云俾臧俾嘉。記稱善頌善禱。夫惟文雅。跂予望之已。

清金安瀾勸捐清江浦創造廣東會館啟

代顏榮山觀察作

清江浦者。南轅北轍。行李之通途。壯貝幺錢。婆蘭之利藪。冠蓋雲集。授餐之館。殷闐闐。星羅近市之居。湫隘將赴樂郊而息。足安得廣廈而懽顏。況吾粵東之至斯也。六千里之道遠。十二郡之人稠。或以宦游。或以商販。或以技售。或以事淹。或

遠適他鄉。暫印雪泥之爪。或壯游茲土。長題湖海之襟。欲慰羈棲。當謀傳舍。某昔年隨宦。久住名區。新歲服官。重來舊地。跡喜萍蓬之合。情思桑梓之聯。因念先榮。祿公任淮安觀察時。有捐修會館之議。開府東河。未遑勦舉。敬承先志。徧告同人。集千腋而成裘。顧爲領袖。架七松而造屋。先芘枌榆。相地寬宏。輸錢踴躍。已有捐銀一千餘兩。本年四月奉旨補授安徽寧池太廣道。將赴征途。急圖竣事。能落成於不日。必欲助之如雲。古處克敦。齊糶史晨之家。穀鄉人皆好勝。資樊澤之裝。錢請列銜名。各書捐數。創基伊始。垂耀將來。此啟。

清蔡篋募捐義塚啟

夫游魂爲厲。驚伯有之介行。坑卒有靈。聽長平之夜哭。秦冤不雪。蜀魄能啼。鬱陰所凝。災沴斯結。苟非割青山之片壤。馬鬣重封。妥白骨於佳城。牛眠永固。其何以使行路則類無有泚。夜臺則目可長暝乎。慨自狂寇陸梁。邑城灰燼。逞豕突鷗張之勢。肆磨牙厲角之凶。刀光白閃。郭子章之頭顱。劫火紅飛。秦阿房之烈焰。遂使

衿裾之佳。士閥閱之名門。嚼齒之壯夫。毀容之奇節。莫不洞胸穿脇。斷脰折肢。他若清流殉身。朱絲畢命。墜樓愛妾。舞榭嬌兒。兔三窟。其安營貉一邱。而同盡嗚呼。封成京觀。等萬命於鯨鯢。掩少藁裡。送餘生於鳶鷂。遂至白楊風動。燐火宵明。宿草霜寒。鬻體對語。閃閃積尸之氣。啾啾新鬼之聲。枯骨埋冤。重泉飲痛。某等手援無術。目擊增悲。思淺土之久淹。冀新阡之改卜。茲幸烽煙告靖。城郭依然。爰合同人共謀義舉。水深土厚。營邨北之樹封。月慘雲愁。異城西之藁葬。衣裳免其顛倒。魂魄安以松楸。伏望縉紳先生。儒林耆碩。合金囊。美負土。分勞遵掩骼之遺文。爲澤枯之陰德。樵蘇十步。田綿以上。同營麥飯。一盂祭墻。閒而亦可。庶衢巷滌腥。聞之染歲時。無疫癘之災。福不唐捐。勝造堵波之七級。詞如楚些。請歌蒿里之一章。謹啟。

清皮錫瑞重修屈賈合祠啟

夫蕭艾滿握。不識迷迭之芳。鴟梟盈庭。反驚歸昌之律。俗翫所見。則罕覩者非珍。

體安所習。則言奇者見棄。卒之閱世論定。風流乃彰。讒夫煙消。警烈彌茂。蘭蕙既謝。惆悵九畹之間。鳳皇高翔。徘徊千仞之下。而俎豆蕪曠。丹青歇剝。望古之士。慨其閔矣。長沙古城。太傅故宅。後以靈均共祀。合爲屈賈之祠。誠以磨蝎同宮。囚鸞比翼。曠世相感。乃投湘水之書。擬人於倫。遂合龍門之傳。若乃稽其行事。比其際遇。異同之迹。可略而言。夫黃棘策施。藍田兵辱。懷王不悟。見欺虎狼之威。頃襄忘仇。有愧大鳥之對。悲感亡國。義激懷沙。太傅生遇清時。何宜痛哭。不知虞廷交儻。猶戒丹朱。鄒嶧責難。不如堯舜。況其時黃頭並進。亦傷聖德。絳侯少文。初非賢輔。中行反覆。何異張儀。三擘厝薪。詎殊戰國。愚諛見謂。安治智士所爲。累歎太息之書。非過激也。三閩楚之同姓。正則裔出高陽。邱墓所依。莊舄病猶思越。肺附既託。非子死欲存韓。堵敖不長。休戚當共。太傅洛陽年少。宜異宗臣。不知知己之恩。武侯由是感激。國士之遇。豫子報以殺身。當其時宣室求賢。歎爲不及。列侯就國。發自下僚。議任公卿。始若左徒。見用毀生。絳灌繼似上官。進讒竊比之意。非不倫也。

嗟乎。江魚腹葬。神恨驂虬。鵬鳥愁生。魂隨墮馬。問天不語。空訴牢愁。弔水何知。難
明。恍慨。遂使女蘿。薜荔。九歌。悲山鬼之遺。沅芷。澧蘭。萬古稱騷人之國。繇世寢遠。
靈宇就頽。蕭條濯錦之坊。寂寞陶公之廟。古柑萎絕。莫留橘頰之香。舊井湮沈。慨
想王明之福。念茲芳烈。宜用尊崇。所當祓飾。荷室塗丹。蘭橈崇璇。題以納月。新傑
構以偃虹。遷客寓公。並秩豐祀。楚豔漢侈。更薰古香。庶將丹荔黃蕉。披髮向大荒
而下。寒林秋草。識我昭詞。客之靈表。風教於茲邦。益深愛國忠君之志。仰芳徽於
往哲。非徒擷香拾豔之才云爾。

(丙)帖 說文帖。帛書署也。古謂之籤。魏晉以還。爲書牘之一名。蓋
單篇隻義。近乎短書。與錄四首。

晉王羲之問慰帖

羲之頓首。闊別稍久。眷與時長。寒嚴足下。何如。想清豫耳。披懷之暇。復何致樂。諸
賢從就。理當不疎。吾之朽疾。日就羸頓。加復風勞。諸無意賴。促膝未近。東望慨然。

所冀日月易得。還期非遠耳。深敬。宜音問在數。遇信勿遽。萬不一陳。

唐顏真卿與李太保乞米帖

拙於生事。舉家食粥。來已數月。今又罄竭。祇益憂煎。輒恃深情。故令投告。惠及少米。實濟艱勤。仍恕干煩也。真卿狀。

清全祖望奉浙東孫觀察論南宋六陵遺事帖子

昨謁幕府。蒙以南宋六陵遺事下問。卒卒未竟其語。冬青之舉。爲世人所豔稱。然祇唐玉潛林白石耳。同時預其事者。雖不能一一著姓氏。如王修竹鄭宗仁鑿鑿可考。謝臬父則陰移冥轉其間。草窗紀陵使羅誥事。雖與諸公不相謀。要亦先後奔走是役者也。獨匡山志所云余則亮。尙當闕之以俟考。明初旣返穆陵遺骸。建雙義祠於鄉大夫祠之左。以祀唐林。已而移之陵右。凡有事於六陵。卽并及之。夫其祠之是也。而惜其於同義諸公有未盡者。某嘗走攢宮下。摩挲宋學士碑文。所有享殿周垣。雖已摧殘殆盡。尙有約畧可尋之跡。而徧問樵夫牧豎。獨失祠址所。

在爲之茫然當時江南舊臣官上都者不少曾不能出一言以保橋山弓劍至使楊髡縱其滔天之惡玉匣珠襦狼籍殆盡諸君子以朝不坐燕不與之身爲故君護龍髓恆星晝隕七度山南踰垣折足幾陷虎口百世而下卽分麥飯一盂以酬明德其亦誰忍替之乃更有大不平者楊髡西番謬種原屬豺虎不食之餘而同惡泰寧寺僧則攢宮首禍所啟也茲者西冷道上雖至五尺之童爭毀楊髡遺蹟鑿飛來峯之塔折六一泉之像甚者貽禍地藏波累天女而泰寧殿宇近在陵寢之側歸然獨存佛燈魚鼓不隨麟辟邪石馬竝泯茂陵秋風猶餘磨劍之輩豈特冬青靈鳥將共杜鵑泣血山鬼有知亦應髮指夫祠祭載在有司今唐林祠宇鞠爲茂草則興廢舉墜是明使君之所以修典禮也逆僧故址犁其地而瀦之抑亦厲風教之一端也合當日扶義之羣使共食於一堂正明使君之所以表幽潛也滄桑岸谷又歷數百祀而遙四山風雨之地一望蒼茫然而向蘭亭以嗚咽索眞帖於誰家諸君子之魂魄猶在此間其奈何過而莫之問也敢以告之執事幸勿

以其迂而棄之。

清全祖望奉答謝石林侍御論碑版故事帖子

會典五品以上用碑。五品以下用碣。庶人祇用壙銘。卽柳州所引唐令也。然以今之官制考之。正難以一例拘。內官則京卿而外。翰詹之講讀諭洗。新升五品之科道。用碑宜也。部郎及內閣侍讀諸官。其可乎。外官則僉事以上。用碑宜也。府貳州牧諸官。其可乎。至右班則非總兵以上。亦難用碑。蓋唐宋時官至五品甚難。與今日稍不同。柳州爲楊郎中作墓碣。謂郎中於品第五。以其秩不克偕。故降從碣。然則古人於此。原有裁量。不肯紊也。自明以來。不論秩而論望。故如郎中之秩。不爲卑。而望甚淺。是又當斟酌而用之。穆堂詹事謂今雖開府以上。苟非有詔賜碑。皆不得稱碑。但可曰墓表耳。故其應陽城相公家之請。但曰墓表。此未嘗詳考會典。而遽爲之說者也。會典固有賜碑之禮。但止爲重臣而設。此自唐宋以來皆然。若五品以上之用碑者。不必俱邀君賜也。賜碑亦有數等。或御製碑文。或但用御篆。

或勅詞臣撰文。或但給碑價而已。其御製文與篆者。非輔臣勛臣不能得。其給碑價者。則賜葬之臣皆得之。若五品以上之用碑者。則特以其官應立碑。卽無卹典。亦得立之。歷考唐宋以至今所同也。至於墓表。則碑碣所通用。墓碣稱表。柳州爲其父侍御府君及陸給事是也。墓碑稱表。歐公爲其父崇公是也。徐師魯謂碑碣有尊卑而表無之。蓋碑碣之變稱是矣。而潘蒼崖謂碑高不過丈二。碣高止四尺。表之高與碣同。是竟以表爲碣。而黃梨洲祖其說。雖本之家禮。然實非也。考之漢人之制。士庶皆得用碑。自唐以後則截然獨香山爲長城縣崔令遺山爲費縣郭令皆作碑。此其僭不可訓。至元人則其誤用益多矣。碑碣之變稱。考之漢人文字。有曰神道闕銘。曰墓闕銘。曰墓石柱文。曰墓幢記。曰冢闕銘。曰穿中柱文。曰殯表。曰靈表。曰神誥。曰哀讚。曰哀頌。曰哀辭。皆金石例所未備也。卒復不罄。

(丁)簡

說文簡牒也。編連爲策。不編爲簡。簡畧之誼。權輿於此。詩出車傳古者無紙。有事書之於簡。謂之簡書。蓋箸之於竹。與書相同。故以爲書牘之名也。字

亦作柬。所謂柬擇其事理所宜也。錄二首。

唐王維招素上人彈琴簡

僕乍脫塵鞅。來就泉石。左右墳史。時自舒卷。頗覺思慮斗然一清。禹俟揮絃。寫我佳況。

宋秦觀與蘇先生簡

某頓首再拜。知府學士先生。比參寥至。奉十二月十二日所賜教。慰誨勤至。殆如服役。把玩彌日。如晤玉音。釋然不知窮困憔悴之去也。即日伏惟尊候。動止萬福。某鄙陋。不能脂韋婉變。乖世俗之所好。比迫於衣食。彊勉萬一之遇。而寸長尺短。各有所施。鑿圓柄方。卒以不合。親戚游舊。無不憫其愚而笑之。此亦理之必然。無足歎者。但以再世偏親。皆垂白。而田園之入。殆不足奉裘褐。供饘粥。犬馬之情。不能無悒悒。爾然亦命也。又將奚尤。惟先生不棄。而時賜之以書。使有以自慰。幸甚。幸甚。窮冬末由侍坐。伏乞爲國自重。下慰輿情。不宣。某頓首拜。

(戊)奏記 說文奏進也。彥和云：記之言志進己志也。古者書記同辭。奏記之誼無殊。進書云爾。錄二首。

漢鄭朋奏記蕭望之

將軍體周召之德。秉公綽之質。有卞莊之威。至乎耳順之年。履折衝之位。號至將軍。誠士之高致也。窟穴黎庶。莫不歡喜。咸曰：將軍其人也。今將軍規撫云：若管晏而休。遂行日仄。至周召乃留乎。若管晏而休。則下走將歸。延陵之臬。修農圃之疇。畜雞種黍。埃見二子沒齒而已矣。如將軍昭然度行。積思塞邪。枉之險。蹊宣中庸之常政。興周召之遺業。親日仄之兼聽。則下走其庶幾願竭區區底厲鋒鏑。奉萬分之一。

漢馮衍奏記鄧禹

衍聞明君不惡切慤之言。以測幽冥之論。忠臣不顧爭引之患。以達萬機之變。是故君臣兩興。功名兼立。銘勒金石。令聞不忘。今衍幸逢寬明之日。將值危言之時。

豈敢拱默避辜而不竭其誠哉。伏念天下離王莽之害久矣。始自東郡之師。繼以
西海之役。巴蜀沒於南夷。緣邊破於北狄。遠征萬里。暴兵累年。禍拏未解。兵連不
息。刑法彌深。賦斂愈重。衆彊之黨。橫擊於外。百僚之臣。貪殘於內。元元無聊。飢寒
並臻。父子流亡。夫婦離散。廬落邱墟。田疇蕪穢。疾疫大興。災異蠶起。於是江湖之
上海岱之濱。風騰波湧。更相駘藉。四垂之人。肝腦塗地。死亡之數。不啻太半。殃咎
之毒。痛入骨髓。匹夫僮婦。咸懷怨怒。皇帝以聖德靈威。龍興鳳舉。率宛葉之衆。將
散亂之兵。唾血昆陽。長驅武關。破百萬之陳。摧九虎之軍。雷震四海。席卷天下。攘
除禍亂。誅滅無道。一暮之間。海內大定。繼高祖之休烈。修文武之絕業。社稷復存。
炎精更輝。德冠往初。功無與二。天下自去亡新。就聖漢。當蒙其福。而賴其願。樹
恩布德。易以周洽。其猶順驚風而蜚鴻毛也。然而諸將虜掠。逆倫絕理。殺人父子。
妻人婦女。燔其室屋。略其財產。飢者毛食。寒者裸跣。冤結失望。無所歸命。今大將
軍以明淑之德。秉大使之權。統三軍之政。存撫并州之人。惠愛之誠。加乎百姓。高

世之聲聞乎羣士。故其延頸企踵而望者。非特一人也。且大將軍之事。豈特珪璧
其行。束修其心而已哉。將定國家之大業。成天地之元功也。昔周宣中興之主。齊
桓霸彊之君耳。猶有申伯召虎。夷吾吉甫。攘其蝥賊。安其疆宇。況乎萬里之漢。明
帝復興。而大將軍爲之。梁棟此誠不可以忽也。且衍聞之兵久。則力屈。人愁。則變
生。今邯鄲之賊未滅。眞定之際復擾。而大將軍所部不過百里。守城不休。戰軍不
息。兵革雲翔。百姓震駭。奈何自怠。不爲深憂。夫并州之地。東帶名關。北逼彊胡。年
穀獨熟。人庶多資。斯四戰之地。攻守之場也。如其不虞。何以待之。故曰。德不素積。
人不爲用。備不豫具。難以應卒。今生人之命。縣於將軍。將軍所杖。必須良才。宜改
易非任。更選賢能。夫十室之邑。必有忠信。審得其人。以承大將軍之明。則雖山澤
之人。無不感德。思樂爲用矣。然後簡精銳之卒。發屯守之士。三軍旣整。甲兵已具。
相其土地之饒。觀其水泉之利。制屯田之術。習戰射之教。則威風遠暢。人安其業
矣。若鎮太原。撫上黨。收百姓之歡心。樹名賢之良佐。天下無變。則足以顯聲譽。一

朝有事。則可以建大功。惟大將軍開日月之明。發深淵之慮。監六經之論。觀孫吳之策。省羣議之是非。詳衆士之白黑。以超周南之迹。垂甘棠之風。令夫功烈施於千載。富貴傳於無窮。伊望之策。何以加茲。

(己)狀 狀之爲言陳也。陳述事實。施之自敵以上。其體與箋啓爲近。錄二首。

唐韓愈與汝州盧郎中論薦侯喜狀

右其人爲文甚古。立志甚堅。行止取捨。有士君子之操。家貧親老。無援於朝。在舉場十餘年。竟無知遇。愈常慕其才。而恨其屈。與之還往。歲月已多。嘗欲薦之於主司。言之於上位。名卑官賤。其路無由。觀其所爲文。未嘗不掩卷長歎。去年。愈從調選。本欲攜持同行。適遇其人自有家事。迺還坎珂。又廢一年。及春末自京還。怪其久絕消息。五月初至此。自言爲閣下所知。辭氣激揚。面有矜色。曰。侯喜死不恨矣。喜辭親入關。羈旅道路。見王公數百。未嘗有如盧公之知我也。比者分將委棄泥塗。老死草野。今胸中之氣。勃勃然復有仕進之路矣。愈感其言。賀之以酒。謂之曰。

盧公天下之賢刺史也。未嘗有所推引。蓋難其人而重其事。今子鬱爲選首。其言死不恨。固宜也。古所謂知己者。正如此耳。身在貧賤。爲天下所不知。獨見遇於大賢。乃可貴耳。若自有名聲。又託形勢。此乃市道之事。又何足貴乎。子之遇知於盧公。眞所謂知己者也。士之修身立節。而竟不遇知己。前古已來。不可勝數。或曰。接膝而不相知。或異世而相慕。以其遭逢之難。故曰。士爲知己者死。不其然乎。不其然乎。閣下旣已知侯生。而愈復以侯生言於閣下者。非爲侯生謀也。感知己之難。遇大閣下之德。而憐侯生之心。故因其行而獻於左右焉。謹狀。

唐李商隱爲濮陽公與度支周侍郎狀

伏見除書。伏承以小司馬掌邦計。伏維感慰。侍郎致君業廣。圖國功深。頃在內朝。則裨大政。昭獻御極。名高侍從之臣。昭肅握圖。迹在循良之傳。今上講求羣辟。深念大藩。以自江之西。雖豫章爲輿壤。而居河之上。推白馬爲要津。爰陟廉車。以登將席。長城萬里。大國二軍。雪諸儒之儒名。盡將軍之威令。果承紫詔。來駕墨車。向

闕。馳。心。敷。廷。識。貌。清。秋。一。鶚。碧。海。孤。峯。天。子。動。容。羣。僚。服。美。便。合。入。居。臺。鉉。以。慰。
華。夷。然。以。天。下。之。賦。輿。海。內。之。財。幣。是。資。經。費。宜。屬。成。謀。苟。失。當。仁。則。乖。大。計。故。
晉。室。有。鬻。練。之。乏。漢。臣。興。造。幣。之。端。是。不。能。人。何。以。爲。國。仰。維。餘。地。已。不。同。年。矧。
又。秩。貳。夏。官。任。毗。司。馬。昔。祈。父。爪。士。未。有。兼。官。方。朔。侍。郎。不。聞。釐。務。倚。之。爲。相。今。
也。其。時。某。伏。限。守。藩。莫。由。申。賀。山。河。百。二。已。抱。歸。心。風。水。五。千。況。兼。離。戀。瞻。望。門。
宇。不。任。懇。誠。

(庚)札 說文札牒也在竹曰簡在木曰牘牒札其通語也後世公府行文專
用此稱書札之誼寢不可見錄二首

清孔廣森謝人代撰詩札

足。下。才。高。倚。馬。價。重。雕。龍。范。岫。之。管。一。雙。江。淹。之。錦。數。尺。僕。略。解。無。吟。其。如。拙。速。
自。觀。藻。咏。兼。切。欽。遲。輒。復。乞。餘。潤。於。懸。河。分。末。光。於。鑿。壁。孔。璋。多。事。亦。代。裁。書。安。
國。少。文。居。然。賦。几。所。幸。謬。同。瓊。瑛。竊。向。秀。之。縹。緗。猶。恐。易。解。淄。澠。怵。陸。機。之。杼。軸。

謹謝。

清梅曾亮覆陳石士先生札

連日未謁。伏維起居安吉爲頌。示文一篇。讀過。今繳上。所言某君集。舊曾見之。其駢體莊雅可誦。所言樂律諸事。曾亮不解。此無以定其是非。大略觀之。固多聞之士也。獨其議論。敗理道。好詆毀。儒先片言。隻字之訛。穿鑿詆欺。文致大惡。駭動後學。不顧所安。傳謂小人無忌憚。荀卿所斥爲陋儒。鬼容者也。士陋於俗學久矣。有曉然而出其類者。謂士之大患。在空疏。吾反是。則天下之能事。盡此而已。背理傷道。吾之小疵也。嘗以爲士之不學。猶婦之失行者。有庸奴其夫者。曰孰若吾不。失行。則若此可也。其鄰婦必聞而笑之。今之學人。大都以不。失行爲奇節。又不獨某君矣。輒此奉覆。不足爲外人道。餘不宣。

(辛)疏

彥和云。疏者布也。布置物類。撮題近意。故小券短書。號之爲疏。自奏

疏之名顯。而書疏之名晦矣。紬覽陶集。猶存此製。別有誼取布陳。同乎公啟。亦古

體也。共錄二首。

晉陶潛與子儼等疏

告儼俟份佚。侈天地賦命。生必有死。自古聖賢。誰能獨免。子夏有言。死生有命。富貴在天。四友之人。親受音旨。發斯談者。將非窮達不可妄求。壽夭永無外請。故耶。吾年過五十。少而窮苦。每以家弊。東西游。走性剛。才拙。與物多忤。自量爲己。必貽俗患。僂俛辭世。使汝等幼而飢寒。余嘗感孺仲賢妻之言。敗絮自擁。何慚兒子。此既一事矣。但恨鄰靡二仲室。無萊婦抱茲苦心。良獨內愧。少學琴書。偶愛閑靜。開卷有得。便欣然忘食。見樹木交蔭。時鳥變聲。亦復歡然有喜。嘗言五月中。北窗下臥。遇涼風暫至。自謂是羲皇上人。意淺識罕。謂斯言可保。日月遂往。機巧好疏。緬求在昔。眇然如何。病患以來。漸就衰損。親舊不遺。每以藥石見救。自恐大分將有限也。汝輩稚小。家貧無役。柴水之勞。何時可免。念之在心。若何可言。然汝等雖不同生。當思四海兄弟之義。鮑叔管仲。分財無猜。歸生伍舉。班荆道舊。遂能以

敗爲成。因喪立功。他人尙爾。況同父之人哉。潁川韓元長。漢末名士。身處卿佐。七十而終。兄弟同居。至於沒齒。濟北汜稚春。晉時操行人也。七世同財。家人無怨色。詩曰。高山仰止。景行行止。雖不能爾。至心尙之。汝其慎哉。吾復何言。

清李慈銘爲人作柯巖造祠屋疏

蓋聞煙霞之勝。因地而奇。林泉之觀。得人乃巧。將成麗驪。必有福基。柯山之陽。有巖呀闢。斤斧所赦。眞靈以棲。羽流失居。歲久蕪葺。山人沈翁。偕其里士。搜剔幽窔。奔走颺颺。稅壤擢泉。芟榛羃石。稍治橋樹。頗有林亭。裙屐匏觴。於焉趨集。而宴處未適。邱壑不完。道俗嗛然。思更營理。將以截水添閣。環樹設堂。堂祀三賢。晉王右軍唐賀

陸

待監

制宋

以配星宿。規摹紫府。彷彿丹崖。秀祕陰陽之區。勝蓄春秋之賞。極候魚鳥。

長窟僑佺。迺告慧業文人。淨土居士。施檀比粟。種福如珠。或散優曇之花。或積遮須之果。或霏金屑於郭穴。或擲丹粒於巴臺。尺宅寸田。悉書玉清之籍。一樹片石。最成靈芝之宮。庶幾月戶添扁。花塍翼堵。綺窗結霧。時來青鳥之蹤。絳蓑切霞。常

衝珠斗之氣。艷塵外之金碧。占壺中之晦明。境異海山。頓現樓觀。支分委宛。別爲洞天。僕幼所釣。游今焉棲。寄疏池。縛屋親見。眞字之開。翦岫苞巖。彌注宏構之飾。法柳州之小記。援晉安之募文。撮舉勝緣。敬想靈諾。

(壬)引

大抵籲衆呼援。近世以來。疏引並用。佛事召募。其文尤多。引之訓陳。抑不背其本誼。特其爲體。與序錄之屬所入者。同名而殊實矣。錄三首。

清李兆洛募脩東林寺引

東林寺重脩大殿。新塑世尊。裝金未了。住持明心。十方勸化。冀得圓成。居士卻道。和尙此段。不是募金。不是裝佛。有善緣者。卽金。卽法。證妙果者。卽佛。卽空。法尙應。捨。何況於金。空無所住。強名爲佛。是爲募化法子。莊嚴空界。能於虛空。生實信心。自於法塵。斷罣礙想。大衆各自理會。當下切莫錯過。這是慈悲歡喜。度一切苦厄。舍利子。大清眞丹。太歲上章。南無清涼寶海慶音觀世音菩薩。示現之日。曷利他。居士饒舌。

清蔡麓體卹溺遺引

紅羊小劫。新摹鄭俠之圖。涸鮒餘生。誰貸莊周之粟。樵蘇不爨。薪桂生愁。溝壑轉移。磬圭勞瘁。呼癸之聲。莫應告辰之策。爰殷將以衽席黔黎。壺漿父老。大裘十丈。人懷共覆之恩。長鋏三彈。客輟歸來之賦。惟飢溺之心。厪已故解。推之惠周人。爲國弭災。爲民請命。典至鉅也。恩至渥也。慨自鱸穴告驚。鯨波遂溢。尾閭不泄。營窟難安。蛟蜃肆其殃。龍蛇厄乎運。死者旣葬魚腹。生者旋歌鴻磬。愁人之淚。雨零積尸之氣。星閃。遂使晉陽城內。竈沒蛙游。萊蕪署中。釜塵魚躍。呼麥麴而逃。智井移蒲。盧而就海。濬困鹿已。虛枯魚徒泣。藐茲子遺。悲可知已。嗟嗟侯門。難倚淒涼。吳市之簫。苦海無邊。落拓阿難之盜。向使汎舟之役。莫繼設館之禮。不修將室等磬。縣罨餘星。照茗華鮮飽。瓠子哀歌。冷炙殘杯。漸熟依人之況。豆羹簞食。驚聞噉爾之聲。凡茲菜色之徒。旋作薤晞之曲。當籌良法。奠厥攸居。秋風戒寒。授衣節近。緯蕭莫恤。衣褐不完。計窮盡篋之搜。誼絕絺袍之贈。未嘗不腰隨帶。緩肘共襟。穿楚

續憐温鄭緇怨敵蒙袂輯屨何以爲情夫易竭者釜鍾難謀者升斗無形者胞與能盡者濟施庶幾始痛其魚終邀有豸博錄舊聞於野菜少延殘喘於翳桑敬告同人襄茲盛舉譬爲山而覆篔爰集腋以成裘梯米發太倉之藏朽紅拜貺俎豆食名山之報斑白銘恩惟君子之澤長信仁人之利溥歡同夏庇願棲寒士以萬間福不唐捐勝造浮屠之七級

清吳汝綸爲里中舉節烈引

吾桐素稱禮教之邦昔之時賢人君子矜孝悌之行重刑于之化正身以正其家以明章婦順當其時婦人女子類能明女教盡婦職有貞靜專一之德而無悖逆違失之行不幸而處其變則本其貞順之性而爲節烈可傳之事其素所漸磨者然也降及近世自縉紳士大夫下至鄉曲愚賤狹邪淫慝家法蕩然入其室姑婦勃谿嘻嗃無度比比而是嗚呼婦順之不章有自來矣兵亂以來陷賊垂十年居民轉徙流離救死不暇偷延喘息廉恥道喪禮教之衰抑又甚焉然而貞女烈婦

不辱身於賊以死自全者所在多有庚申辛酉之間賊之鹵掠益橫而里之貞女節婦益夥死於水火鋒刃者計不下百數十人嗚呼又何其多也夫其始禮教興隆薰炙於賢人君子之化而女教謹婦職修其多節烈可傳之事亦固其所而至禮教陵遲之後賢人君子之化既泯然無聞而所謂女教婦職者亦絕而不復講而貞女烈婦且猶指不勝屈如此豈人性之善雖磨滅剝蝕終不能盡泯耶抑猶前世之流風遺澤入人心者至深且遠歟且夫婦順者順於舅姑和於室人而當於夫氏者也其道在家庭日用之間動靜起居之際其理甚庸其境甚順其法易修而其事易盡初非若節烈者之守節死義所處之逆而所爲之難也今夫臨危難持節義致命遂志堅忍不撓古忠臣烈士所爲難能而可貴者而婦人類能之而謂順而舅姑和而室人當而夫氏彼固有所不能豈果然歟惜乎其無有示之以身教導之以內則如古時賢人君子之所爲者也今制府曾公採訪忠義節烈將上之天子請旨表揚以爲天下勸此誠興教化正風俗之至意也余將盡舉里

中貞女烈婦死於賊者。悉具以聞。以發潛德而闡幽光。而由此類以推之。誠得二三賢達。敦崇秩序。綱紀人倫。修之身。施之家。化之鄉里。將見禮教振興。婦順修明。復如曩時。皆於是乎在矣。然則茲舉也。又豈獨貞女烈婦之厚幸也哉。